

宋

史

一八



志卷第十六

宋史六十三

關儀同司上柱國錄軍國重事前書右丞相監修國史領鑑選事都總裁監修等奉  
敕  
黎

五行二上火

炎上火之性也火失其性則為災眚舊說以恒煥草  
妖羽蟲之孽羊禍赤眚赤祥之類皆屬之火今從之  
建隆元年宿州火燔民舍萬餘區二年三月內酒坊  
火燔舍百八十區酒工死者三千餘三年正月滑州  
甲仗庫火燔儀門及軍資庫一百九十九區兵器錢帛  
並盡開封府通許鎮民家火燔廬舍三百四十餘區

二月安州牙吏施延業家火燔民舍并顯義軍營六百餘區五月京師相國寺火燔舍數百區海州火燔數百家死者十八人乾德四年二月岳州衙署廩庫火燔市肆民舍殆盡官吏踰城僅免三月陳州火燔民舍數十區潭州火燔民舍五百餘區踰月民周澤家火又燔倉廩民舍數百區死者三十六人是春諸州言火者甚衆八月衡州火燔公署倉庫民舍僅千餘區五年京師建隆觀火開寶三年八月辰州解火燔軍資庫五年七月忠州火倉庫殆盡七年九月永城縣火燔民舍一千八百餘區八年四月洋州火燔

州廨民舍千七百區永城縣火燔軍營民舍千九百  
八十區死者九人太平興國七年八月益州西倉災  
雍熙元年五月丁丑乾元文明二殿災初夕陰雲雷  
震火起月華門翌日辰巳方止二年九月庚寅夜楚  
王元佐宮火燔舍數百區王是以疾廢于家三年  
光化軍民郤勲家火延燔軍廨舍庫端拱元年二月  
雲安軍威棹營火二年三月衡州火燔州縣官舍倉  
庫軍營三百餘區又崇賢坊有烏燔數十處七日不  
滅淳化三年十月蔡州懷慶軍營火燔汝河橋民居  
官舍三千餘區死者數人十二月建安軍城西火燔

民舍官廨等殆盡四年二月永州保安津舍火飛焰  
過江燒州門及民屋三百餘家咸平二年四月池州  
倉火燔米八萬七千斛景德元年正月平虜軍營火  
焚民居廬舍甚衆四年十一月郢州火燔倉庫並盡  
大中祥符元年正月桂州甲仗庫災二年四月昇州  
火燔軍營民舍殆盡四年八月徐州草場火十月鎮  
州城樓戰棚火七月雄州甲仗庫火八年二月甲寅  
宗正寺火四月壬申夜榮王元儼宮火自三鼓北風  
甚癸酉亭午乃止延燔左承天祥符門內藏庫朝天  
殿乾元門崇文院祕閣天書法物內香藏庫九年五

月甲子左天麻坊草場火天禧二年二月戊寅北宅  
蔡州團練使德雍火延燔數百區三年春京師多火  
六月永州軍營火延民舍數百餘區五年四月丁巳  
事材場火天聖三年二月丁卯蘄州榷貨務火五年  
四月壬辰壽寧觀火七年六月丁未玉清昭應宮災  
初大中祥符元年詔建宮以藏天書七年宮始成凡  
二千六百一十楹至是火發夜中大雷雨至曉而盡  
明道元年八月壬戌修文德殿成是夜禁中火延燔  
崇德長春滋福會慶崇徽天和承明八殿景祐三年  
七月庚子太平興國寺火起閣中延燔開先殿及寺

舍數百楹是夕大雨雹十月己酉澶州橫龍水口西  
岸料物場火焚薪芻一百九十餘萬寶元二年六月  
丁丑益州火焚民廬舍二千餘區康定元年六月乙  
未南京鴻慶宮神御殿火慶曆元年五月癸亥慶州  
草場火延燔州城樓櫓三年十一月丙寅上清宮火  
四年三月丙戌夜代州五臺山寺火六月丁未開寶  
寺靈感塔火七月甲子燕王宮火六年七月辛丑洪  
福禪院火八年正月壬午江寧府火初季景江南大  
建宮室府寺其制多倣帝室至是一夕而焚唯燭殿  
獨存皇祐五年正月丁巳會靈觀火至和元年四月

辛丑祥元觀火二年并州太宗神御殿火嘉祐三年正月溫州火燔屋萬四十間死者五十人治平四年十二月壬子夜睦親官火焚九百餘間甲寅廣親宮又火熙寧六年三月丙申永昌陵上宮火燔東城門七年九月壬子三司火自已至戌焚屋千八百楹案牘殆盡十一月洞真宮火九年十月魯王濮王宮火十年正月仙韶院火撤屋二百五十楹三月丙子開封府火元豐元年八月邕州火焚官舍千三百四十六區諸軍衣萬餘襲穀帛軍器百五十萬四年六月衡州火燒官舍民居七千二百楹欽州大雷震火焚

城屋五年二月洞真宮火八年二月辛巳開寶寺火時寓禮部貢院於寺點校試卷官翟曼陳之方馬希孟焚死吏卒死者十四人元祐元年三月宗室宮院火六年十二月開封府火紹聖三年三月七日內尚書省火尋撲滅上諭執政禁中屢火方醮禳已罷春宴仍不御垂拱殿三日四年七月甲子禁中火元符元年四月宗室宮院火建中靖國元年六月壬寅集禧觀火大雨中久而後滅崇寧二年六月中太乙宮火三年三月辛丑大內火政和三年四月蘇州火延燒公私屋一百七十餘間五月封州火延燒公私屋

六百八十二間五月辛丑京師大盈倉火是歲成都府大慈寺溫州絳州皆火重和元年九月掖庭大火自甲夜達曉大雨如傾火益熾凡爇五十餘間後苑廣聖宮及宮人所居幾盡焚死者甚衆靖康元年十二月丙子夜尚書省火延燒禮祠工刑吏部拆尚書省牌擲火中禳之乃息二年三月戊戌天漢橋火焚百餘家頃之都亭驛又火己酉康門火紹興元年十月乙酉臨安府越州大火民多露處十二月辛未越州火焚吏部文書乙酉移蹕錢塘二年正月丁巳宣州火燔民居幾半五月庚辰臨安府大火亘六七里

燔萬數千家十二月甲午行都大火燔吏刑工部御  
史臺官府民居軍壘盡乙未旦乃熄三年九月庚申  
行都闕門外火多燔民居四年正月戊寅行都火燔  
數千家六年二月行都屢火燔千餘家十二月行都  
大火燔萬餘家人有死者時高宗親征劉豫都民之  
暴露者多凍死七年正月辛未平江府火二月辛丑  
鎮江府楚真楊太平州火是歲臨安府火八年二月  
丁酉太平府大火宣撫司及官舍民居帑藏文書皆  
盡死者甚衆錄事參軍呂應中當塗縣丞李致虛死  
焉九年二月己卯行都火七月壬寅又火十年十月

行都火燔民居延及省部十一月丁巳溫州大火燔  
州學酤征舶等務求嘉縣治及民居千餘十一年七  
月癸亥婺州大火燔州獄倉場寺觀暨民居幾半九  
月甲寅建康府火燔府治三十餘區民居三千餘家  
十二年二月辛巳鎮江府火燔倉米數萬石芻六萬  
束民居尤衆是月太平池州及蕪湖縣皆火三月丙  
申行都火四月行都又火十四年正月甲子行都火  
十五年大寧監火燔官舍帑藏文書九月甲子行都  
火經夕漸近太室而滅十七年八月建康府火十二  
月辛亥靜江府火燔民舍甚衆二十年正月壬午行

都火燔吏部文書皆盡二十五年汴京宮室悉焚二  
十六年潭州南嶽廟火二十九年四月鎮江府火焚  
軍壘民居十二月丙子夔州大火燔官舍民居寺觀  
人有死者乾道元年正月泰州火燔民舍幾盡是年  
春德安府應城縣廐驛火二年冬真州六合縣武鋒  
軍壘火十二月婺州火自是火患不息人火之也三  
年五月泉州火五年十二月壬申太室東北垣外民  
舍火七年十一月丁亥禁垣外閹人私舍火延及民  
居九年九月台州火經夕至于翌日晝漏半燔州獄  
縣治酒務及居民七千餘家淳熙元年十二月丁巳

泉州火燔城樓及五十餘家二年六月戊午潭州南  
嶽廟火八月嚴州火十一月癸亥麗正門內東廡災  
是歲瀘州火坐上焚民居不實守臣貶秩三年九月  
大內射殿災延及東宮門四年十一月辛酉鄂州南  
市火暴風通夕燔千餘家五年四月庚寅興州沙市  
火燔三百四十餘家有死者十一月和州牧營火燔  
一百六十區七年二月江陵府沙市大火燔數千家  
延及船艦死者甚衆八月溫州試士火作于貢闈八  
年正月揚州火九月乙亥行都火九年九月合州大  
火燔民居幾盡官舍僅有存者十一年二月辛酉興

元府義勝軍壘舍火十二年八月溫州火燔城樓及  
四百餘家十月鄂州大火燔萬餘家江風暴作結廬  
隄上泊舟岸下者焚溺無遺十四年五月大內武庫  
災戎器不害六月庚寅行都寶蓮山民居火延燒七  
百餘家救焚將校有死者五月成都府市火燔萬餘  
家十六年九月南劒州大火民居存者無幾紹興元  
年八月壬寅虔州火燔數百家十二月戊申建寧府  
浦城縣火時查洞寇張海作亂焚五百餘家二年四  
月行都傳法寺火延及民居言者以戚里土木為孽  
火數起之應是月徽州大火夜燔州治譙樓官舍獄

宇錢帑庫務凡十有九所五百二十餘區延燒千五百家自庚子至于壬寅乃熄五月己巳金州火燔州治官舍帑藏保勝軍器庫城内外民居甚衆三年正月己巳行都火通夕至于翌日闌闢焚者半十一月又火燔五百餘家十二月甲辰郢州火至于翌日燔八百家慶元二年八月己酉永州火燔三百家三年閏月甲申金州都統司中軍壘舍火焚千三百餘區閱六月乙酉又火燔二千餘區是冬紹興府僧寺火延燒數百家六年八月戊戌徽州火燔州獄官舍延及八百餘家嘉定元年三月戊寅行都大火至于四

月辛巳燔御史臺司農寺將作軍器監進奏文思御  
輦院大史局軍頭皇城司法物庫御厨班直諸軍壘  
延燒五萬八千九十七家城內外亘十餘里死者五  
十有九人踐死者不可計城中廬舍九燬其七百官  
多僦舟以居火作於寶蓮山御史臺胥楊浩家諫議  
大夫程松請戮浩以謝都民疏再上始黥配萬安軍  
猶免決自是民訛言相驚亡賴因縱火為姦利二年  
六月己卯臨安府火三年正月丁酉襄陽府火作而  
風暴選鋒軍校于友直死於救焚止延燒六十餘家  
帥漕臣上其功贈二秩官其子二十一月甲午福州

火燔四百餘家四年三月丁卯行都大火燔尚書中  
書省樞密院六部右丞相府制勅糧料院親兵營脩  
內司延及學士院內酒庫內宮門廡夜召禁旅救撲  
太室撤廟廡遷神主并冊寶於壽慈宮翼日戊辰旦  
火及和寧門鴟吻禁卒張隆飛梯斧之門以不焚火  
作時分數道燔二千七十餘家又翌日己巳神主還  
太室時省部皆寓治驛寺四月丙申臨安府梵天寺  
火六月盱眙軍天長縣禁軍營火鎧械為盡八月壬  
辰郢州外南市火燔五百餘家開禧二年二月癸丑  
壽慈宮災四月壬子行都火燔數百家嘉定二年八

月己巳信州火燔二百家九月丁酉吉州火燔五百  
餘家是歲瀘州火燔千餘家十一月丁亥建寧府政  
和縣火燔百餘家四年閏二月己卯紹興府嵊縣浦  
橋火燔百餘家三月除州火燔民居甚多十月撫州  
火辛卯福州一夕再火燔城門僧寺延燒千餘家死  
者數人五年五月己未和州火燔二千家八年八月  
辛丑湖州火燔寺觀延燒三百家九年七月甲戌南  
劍州沙縣火燔縣門官舍及千一百餘家民有死者  
十一年二月行都火燔數百家九月己巳禁垣外萬  
松嶺民舍火燔四百八十餘家十三年二月庚寅安

豐軍故步鎮火燔十餘家死者五十餘人八月庚午  
慶元府火燔官舍第宅寺觀民居甚衆十一月壬子  
行都火燔城內外數萬家禁壘百二十區十七年四  
月丁卯西和州焚軍壘及居民二千餘家人火之也  
守臣尚震午誤以為金人至而遁六月丁亥岳州火  
燔岳陽樓州獄帑庫延及八十家己丑又火燔百餘  
家紹定元年三月行都火燔六百餘家嘉熙元年六  
月臨安府火燔三萬家淳祐元年徽州火十二年十  
一月丙申行都火至丁酉夜始熄景定四年紹興火  
五年臨安府大火德祐元年玉牒所災

乾德二年冬無雪五年冬無雪開寶元年冬京師無  
雪二年冬無雪淳化二年冬京師無冰至道元年冬  
無雪二年冬無雪大中祥符二年京師冬溫無冰天  
聖五年夏秋大暑毒氣中人嘉祐六年冬京師無冰  
治平四年冬無雪元豐八年冬無雪元祐元年冬無  
雪四年冬京師無雪五年冬無冰雪紹興五年五月  
大燠四十餘日草木焦槁山石灼人渴死者甚衆三  
十一年冬無雪乾道三年冬溫少雪無冰五年冬溫  
無雪六年冬溫無雪冰紹熙三年冬潼川路不雨氣  
燠如仲夏日月皆赤榮州尤甚慶元元年冬無雪二

年冬無雪四年冬無雪越歲春燠而雷六年冬燠無  
雪桃李華蟲不蟄開禧三年冬少雪嘉定元年春燠  
如夏六年冬燠而雷無冰蟲不蟄八年夏五月大燠  
草木枯槁百泉皆竭行都斛水百錢江淮杯水數十  
錢渴死者甚衆九年冬無雪十三年冬無冰雪越歲  
春暴燠土燥泉竭

建隆二年九月亳州獻芝一株乾德四年閏八月黃  
岡縣民段贊屋柱生紫芝一本二莖知州鄧守忠以  
獻十二月登州獻芝五莖開寶四年成都在府民羅達  
家生芝六年正月知梓州趙延通獻芝一本河中府

大明觀殿芝草生節度使陳思讓以聞七年七月陳州節度党進獻控鶴管卒孫洪家芝二本八月又獻芝一本四十九莖九月麻城縣解芝生柱上刺史王明以獻十月梓州獻芝草太平興國二年八月青城縣民家竹一本上分雙莖三年六月項城縣令王元正獻芝草七月廣州獻芝草八月功臣堂柱生芝二本知州范旻畫圖以獻四年八月廣州獻芝草九月華山道士丁少微獻白芝黑芝各一噐五年五月眉山縣竹一莖十四節上分二枝長丈四尺九月真定府行宮殿梁生芝如荷花知府趙賢進以圖來上十

月龍水縣華嚴寺舊截竹為筒引水忽生枝葉長二丈許知州姜宣以聞六年三月廣州獻黃芝一本九莖七月新津縣趙豐村竹一莖十二節上分兩岐知州崔憲以聞七年六月知黃州裴仁鳳獻芝草七月知羅江縣陳覃於羅瓊山獲芝四本以獻湘陰縣萬壽寺松根芝草二本生轉運副使趙昌獻芝八月再生四本昌又獻潭州民歐陽進夏侯敏園中芝三本宜興縣民長孫裕家生芝紫莖黃蓋十月雄州實信院竹叢生芝草僧致仁采之復生悉以上獻八年二月知福州何允昭獻芝二本五月漢州獻芝十月乙

酉蜀州獻瑞竹一本十六節上分兩枝知連州史昭  
文獻芝二莖十一月婺源縣民王化於王陵山石上  
得紫芝一本叢生五莖金州監軍解生芝三本九年  
十月金州獻芝三本永康軍獻芝九莖同日至闕下  
十一月知梓州沈護獲芝三莖雍熙二年七月靈州  
芝草生知州侯贊刻木為其狀來獻三年三月殿前  
承旨張思能使楚泗獻所得芝草五本四月眉山縣  
獻異竹圖八月刑部尚書宋琪家牡丹三華端拱元  
年五月知襄州郝正獻芝五本八月廣州鳳集合歡  
樹下得芝三本二年七月彭山縣民家生異竹舒州

芝草生知州趙孚以獻十月密州獻芝草淳化元年  
四月永州監軍廨芝草生知州克憲以聞八月黃州  
刺史魏丕獻芝草二年二月射洪縣安國寺竹二莖  
同本六月舒州竹連理知州樂史以聞十一月陵州  
民趙崇家慈竹二莖長六尺許其上別有根柢莖分  
十枝長丈餘又一本三莖並聳三年十月朗州異竹  
生京師太平興國寺牡丹生華占云有喪是月恭孝  
太子薨四年正月知興化軍馮亮獻芝草十月彭門  
芝草生十二月榮州獻異竹圖五年正月密州獻芝  
草四本枝葉扶疎二月知溫州何士宗獻芝草五本

十月又獻十本至道元年十一月潭州監軍廨生竹一本長二尺許枝葉萬餘尤為殊異二年六月虔州龍泉縣合龍院一竿分兩枝河南縣民張知遠家芝草生判府呂蒙正表上之閏七月密州獻芝二本三年二月廣東轉運使康戬獻紫芝咸平元年十二月宣化縣保聖山瑞竹生一本二枝二年閏二月宣池歛杭越睦衢婺諸州箭竹生米如稻時民飢采之充食九月劍州驛廳梁上生芝草一枝三朵其色黃白知州李仁衡圖以獻四年正月維州獻芝草一本如佛狀十二月知淮陽軍王礪獻芝草三本六年五月

導江縣民潘矩田生芝三層黃紫色高五寸許九月  
相州牧龍坊生芝一莖色紫黃長尺餘分七枝枝如  
手五指狀其最上枝類鳳者知州張鑑以獻景德三  
年八月蔡州獻芝草四年十月知廣安軍王竒上芝  
草圖十二月蓬州上瑞竹圖大中祥符元年四月溫  
州獻瑞竹圖五月辛未以東封遣經度制置使王欽  
若祭文宣王廟於孔林得芝五株色黃紫如雲色及  
人戴冠冕之狀詔內侍楊懷玉祭謝復得芝四本輕  
黃如雲氣之狀癸未內侍江德明於白龍潭石上得  
紫黃芝一本以獻六月瑕丘縣民宋固於堯祠前得

黃紫芝九本連理者四又縣民蔡珍得芝一本王欽若以獻欽若又於岱嶽及堯祠前再得芝二十二本連理者二及有貫草石者七月欽若親獲芝十一本又州長及民所得二十六本有重臺連理及外白內紫之狀且言泰山至日生芝草軍民競采請給緺帛從之兗州獄空司理參軍郭保讓掃除其間得芝四本八月湏城縣民家芝草生乾封縣民家屋柱生芝滋長連袤色鮮潔如繪畫欽若獻芝草八千一百三十九本有貫草木附石連理及飾為寶山者黃州獻異竹一本雙莖九月趙安仁來獻五色金玉丹紫芝

八千七百十一本鞏縣柴務牡丹華十月泰山芝草  
再生者甚衆辛丑車駕次鄆州知州馬元方獻芝草  
五本甲辰欽若等又獻泰山芝草三萬八千五十本  
有並五連三連理者五色重暉如寶蓋下相連帶凡  
草木五穀如寶山靈禽瑞獸之象者六百四十二詔  
令封禪日列天書輦前又送諸路名山勝景及賜宰  
相是月復州獻芝草類神仙佛像河中府酒厨梁上  
生芝一本十二葉其色如玉安陽縣段贊家紫芝連  
理長尺餘又民李釗屋柱生芝三本霍丘縣河亭及  
聖惠坊並有紫芝生十二月福州懷安縣龍眼樹上

紫芝連理溫州獻靈芝圖二年正月福州荔枝樹生  
連理芝二本二月饒州獻芝草四本七月遂州皇澤  
寺芝草生凡五十本九月榮州廨庭中生芝二本十  
月果州青居山獻金暉連理芝草十一月華山張超  
谷石上生紫芝二本嵩岳生芝草五十本石首縣文  
宣王廟殿柱芝草生又龍蓋山萬福里民宗永昌園  
藤上芝草生一本雙莖十二月漢州芝草生黔州芝  
草一莖十二枝若山峰狀三年正月井研縣三惠寺  
生芝草十本二月昌州廨廳柱芝生四本閏二月饒  
州芝草生三月西充縣青蓮塔院太平觀並生芝草

四月京師竹有華占云歲不豐六月縣邵鄂州並芝  
草生七月虢州聖女觀生芝草三本八月穎縣民得  
田芝十二本蜀州生芝草一莖九葉江陵縣民張仲  
家竹自根上分幹其一幹又分三莖九月江陵府永  
泰寺竹出地七節分為兩莖長丈餘知府陳堯咨以  
聞華州敷水民侯元則入華陽川石鐸得芝一本知  
州顧端以獻十月份內侍任文慶詣茅山設醮洞中獲  
芝草二十八本有如人手者十一月安鄉縣謝山獲  
芝二十二本其七狀如珊瑚而色紫十二月神泉縣  
獲芝四本四年正月知華州崔端獻芝草狀如仙人

掌湏城縣民李道安於黃仙公洞臺上得芝草一本以獻二月崔端又獻芝草十本知益州任中正獻芝草二十二本知遂州母賓古獻芝草四月古田縣僧舍竹一本上分三莖端昌縣民李讓家筀竹一本去地五尺許分為二莖知州范應辰以聞六月夔州芝草生廩舍中七月知亳州徐泌知江州王文震並獻芝草知郴州袁延慶獻芝草十本八月邕州雲封寺柏樹生芝五本知州劉知詰以獻西充縣廣川王廟生芝十本其三連理八月知信州李放獻瑞竹圖三本十一月河中府獻芝草真源縣民王順慈司徒捷

家生芝各一本岳州道州並獻芝草南嶽奉冊使薛  
映副使錢惟演過荆門軍神林石上獲芝草以獻十  
二月鉛山縣仁壽僧舍生芝草一本雙枝長尺八寸  
五年六月潯州六祖院法堂紫芝雙秀知州高志寧  
以聞八月亳州獻芝草十月澤州廳事梁上生白莖  
紫蓋芝二十四本閩十月常州芝草生又蕭山縣芝  
生李樹上十一本十一月廣州獻芝草二百三十七  
本晉原縣僧舍芝草一本十二月隨州芝草生亳州  
獻鹿邑縣民所獲芝草四本候官縣山上生芝草五  
十四本閩縣望泉寺生芝草十本寧德縣支提山石

上生芝草十五本六年二月江州廬山崇聖院生芝  
九本知州王文震以獻四月饒州承天院東山生芝  
四本連葉六月壽丘縣獲紫莖金芝一本景陵縣管  
陽山林中獲芝三十本七月內侍石延福登兗州壽  
丘獲芝一本貫草而生又旁得三十本亳州團練使  
高漢英獻芝八本鼎州城門柱下生芝一本八月繼  
照堂生芝一本紫莖黃蓋奉祀經度制置使丁謂至  
真源縣太清宮道士瀨陽鄉民繼獲芝八十本以獻  
乙丑又獲二百五十本有一本三莖一莖如雲氣佛  
像者九月又得宋城縣民所獲芝五十本獻之十月

丁謂來朝獻芝草三萬七千一百八本飾以仙人寶  
禽異獸之狀十一月又獻九萬五千一百本明年車  
駕至真源民有詣行闕獻者又一萬八千本是冬充  
州景靈宮芝草生慶成軍大寧廟聖製碑閣生金芝  
二本昭州龍嶽山資壽寺芝草生潯州廳廨柱芝生  
一本上分為二其上又生二本凡三重無錫縣民曹  
詵家食案生芝赤黃有光長尺許又知南安軍章得  
一獻芝草七年正月明州獻茹侯山上芝草一本  
四莖二月知信州歐陽陟獻芝草七本忠州獻芝五  
本四月福州獻芝草二本五月郪縣西上石崖生紫

芝十五本七月華州民入華山得白石上芝草雙莖連蓋八月均州獻州獻芝千二百二十七本十月慶成軍大寧廟石雙莖芝生其上合幹明英二州芝草生十一月蜀州芝草二本生竹根八年二月青州武成王廟柱生芝一本知州張知白以圖獻三月榮州應靈縣彌陀佛舍生紫芝三本其一雙幹上如蓋四月昌州有芝生石上一本四莖其色黃白四月彰明縣民家竹一根上分二本十三節又開元寺桃竹一莖上分十八節皆相對五月道州舜祠旁生芝二十一本六月盩厔縣民家芝草三莖共成一葉又石芝

十一本晉原縣民栢衆家生芝三根合為一本九年七月知信州董溫獻芝十二本八月知廬州余獻卿獻芝二本九月涪城縣石壁生芝二本十一月武岡縣民何文化園竹生兩株同本上分四莖十二月晉原縣民李彥滔家竹一本雙莖對節知州王世昌圖以獻天禧元年三月新津縣平蓋下玉皇案下芝草生鄂州天慶觀聖祖殿芝草生四月邵陽等縣竹生穗如米民饑食之又浮梁縣竹生穗如米七月漢陽軍太平興國寺異竹一本生二莖節皆相對十二月庚午內出芝草如真武像二年正月庚子內出真遊崇

徽二殿梁上芝草圖示宰相五月兗州景靈宮昭慶  
殿生金芝二本三年六月漢陽軍芝草生一百五十  
餘本七月嵩山崇福宮獲芝草一百本有重臺連理  
貫草者知河南府馮拯以獻四年四月梁山軍民王崇  
辰竹園生金暈紫芝五本十一月上饒縣民王壽園  
中生芝草三本皆金暈其二連理乾興元年六月蘇  
秀二州湖田生聖米居民取以食興州竹有實如大  
麥民取以食占曰大饑八月洋州民李永負土成母  
墳芝生墳上天聖元年五月興州竹有實如大麥民  
取以食之占曰竹有實大饑八月甲寅有芝生于天

安殿柱召輔臣觀之九月戊午城西下木場芝草生  
三年七月梓州城門生芝二本四年正月梓州民家  
生芝四本九月榮州芝生明道元年七月榮州連州  
並芝生景祐二年九月嘉州芝草生四年五月丙寅  
有芝生于化成殿楹慶曆元年二月丙午京師雨藥  
二年八月梓州芝草生五年八月洪州章江禪院堂  
柱芝草生高一尺三寸葉二十一層色白黃有紫暈  
旁生小芝葉九層上有氣如煙皇祐元年七月福州  
生芝一十二本十月湖州芝草生三年六月丁亥無  
為軍獻芝草凡三百五十本上曰朕以豐年為上瑞

賢臣為寶至於草木魚蟲之異焉足尚哉五年閏七月榮州芝草生嘉祐三年十一月河南府芝草生六年正月清川縣漢光武祠生芝草一本三岐八月施州歌羅岩生芝四本十月汝州新岩巡檢廨舍生芝五本熙寧元年益陽縣雷震山裂出米可數十萬斛賣至京師信米色黑如炭八年七月鼎州產芝三本其一類珊瑚枝葉摻結監官縣三月地產物如珠可食水產菜如菌可為菹饑民賴之九年五月流江縣產芝二十一本元豐二年四月眉州生瑞竹六月忠州雨豆七月甲午南賓縣雨豆十一月全州芝生

十二本三年六月安州芝生二十九本其一連理臨江軍芝生四十三本四年十月鄰縣天慶觀生瑞竹一本自第九節分莖雙起五年七月永康縣生紫芝九本十一月閩中縣生紫芝六金芝七永康縣生紫芝九八六月吉州芝生三十三本十二月滕縣官舍生異草經月不腐七年四月景靈宮芝生六本於天元殿門五月開化縣芝生九本黃白紫色八月永安陵下宮芝生一本十月青州芝生二十一本元祐元年七月武安軍言前秘書省正字鄧忠臣母墳前生芝草一本紫莖黃蓋三年六月臨江縣塗井鎮兩白朮

七月又雨黑黍四年九月江津縣石上生芝草二本  
六莖五年二月晉原縣生芝草四十二本七年十一  
月滁州生芝二百餘本紹聖三年九月淄川縣生芝  
草有殼十科穿芝草生二枝十月河南府大內地生  
芝草元符二年正月虔州民田生瑞竹二月瀘州生  
芝草一本同根駢幹至蓋復合為一又衡州郡廳生  
紫芝一根十六葉崇寧元年八月盤石縣芝草連理  
三年十月復州澤州芝草生四年正月戎州宿州芝  
草生七月瀘州芝草瑞竹生五年冬澶州安州芝草  
生大觀元年三月宣鄆湖潤州皆芝草生廬州雨大

豆九月崇天臺及兗州孔林芝草生二年陳充筠州  
廣德軍芝草生三年秋西京湖海普渠州南安軍芝  
草生政和元年正月萊州芝草生十一月虔州聖祖  
殿芝草生二年二月戊子河南府新安縣蟾蜍背生  
芝草自是而後祥瑞日聞玉芝產禁中殆無虛歲凡  
殿宇園苑及妃嬪位皆有之外則中書尚書二省太  
學醫學亦產紫芝四年八月建州境內竹生米數千  
萬石五年十一月癸酉越州承天寺瑞竹一竿七枝  
幹相似其葉圓細生花結實詔送秘書省仍拜表賀  
五年五月禁中芭蕉連理八月甲子蘄州進芝草一

萬一千六百枝內一枝紫色九幹十二月己未汝州進六萬本其間連理雙枝者一千八百八十有司不勝其紀初猶表賀後以為常不皆賀也時朱勝非為京東提舉學事行部至密州界見縣令部數百夫入山採芝彌漫山谷皆芝菌也或附木石或出平地有一本數十葉層疊高大衆色咸備郡守李文仲採及三十萬本每萬本作一綱入貢文仲尋進職授本道轉運使建炎二年九月癸卯權知密州杜彥獻芝草五葉如人指掌色赤而澤宰臣黃潛善奏色符火德形像股肱之瑞高宗不啓視却之紹興元年七月乙

未浙西安撫太使劉光世以枯桔生穗奏瑞高宗曰  
朕在潛邸梁間生芝草官僚皆欲上聞朕手碎之不  
欲寶此竒恠乃却之十六年正月辛未瀘州天雨豆  
近草妖也十六年梅州孔子廟生芝二十一年紹興  
府學御書下生芝番陽縣石門民家籬竹生重萼牡  
丹又民家竈鼎生金色蓮華房州治所綵山下生蕙  
萬州虔州故生池生蓮皆同蒂異萼二十三年六月  
汀州生蓮同蒂異萼者十有二二十五年五月太室  
楹生芝九莖秦檜帥百官觀之稱賀勾龍庶沈中立  
以獻頌遷擢周麟之請繪之鹵簿行旗檜孫禮部侍

郎墳請以黎州甘露降草木道州連理木鎮江府瑞  
瓜南安軍瑞蓮嚴信州瑞芝悉圖之旗是冬檜薨高  
宗曰比年四方奏瑞文飾取悅若信州林機奏秦檜  
父祠堂生芝佞諛尤甚明年四月甲午詔郡國無獻  
瑞乾道元年七月池州竹生穗實如米飢民采之以  
食守臣魯晉為野穀生竹圖以獻御史劾晉不以民  
食草木為病坐佞免官慶元五年八月太室西北夾  
室楹生白芝四葉前史以白芝為喪祥明年八月國  
連有大喪嘉泰二年十一月秘書省右文殿楹生芝

二莖

志卷第十六

志第十七

宋史六十四

卷之三  
修

五行二下火

乾德二年十月眉州獻禾生九穗圖四年四月府尉氏縣  
雲陽縣並有麥兩歧五月魚臺縣麥秀三歧六月南充縣  
民何約田禾一莖十三穗一莖十一穗七月又生一莖九  
穗開寶二年五月梓蜀二州六年四月東明縣八年五月  
鄭州梓州合州巴川縣並獻瑞麥太平興國元年九月隰  
州獻合穗禾長尺餘十月渝州獻九穗禾三年四月夏縣

五月舒州六月閩州麥並秀兩歧四年七月洺州獻嘉禾  
卽資二州禾並九穗八月涇州民田並有嘉禾九月知溫  
州何士宗獻嘉禾九穗圖五年七月蓬萊縣民王明田穀  
隔壠合穗相去一尺許八月知慈州張愈獻合穗禾九月  
流溪縣六年五月汝陰縣九年五月施州麥並秀兩歧端  
拱元年五月陳州淳化元年四月魏城縣七月閩州二年  
四月蔡州五月陳州陵州仁壽縣四年五月達州五年四  
月永城縣並獻瑞麥至道元年六月嘉禾生眉山縣蕭德  
純田一本二十四穗七月金水縣胥羅翊田禾生九穗舒  
州監軍吳光謙解粟畦兩本歧分十穗臨渙縣民侯正家

二禾合成一穗八月綿竹縣禾生九穗夏州園練使趙光  
嗣獻嘉禾一函十月濠州獻瑞穀圖二年五月泗州獻瑞  
麥三年二月洋州嘉禾合穗知州施翊以聞四月唐州遂  
州磐石縣並獻瑞麥五月黃州建昌軍麥秀三穗八月  
雅州禾一莖十四穗雄州嘉禾生九月知代州李允正獻  
嘉禾穗一匣咸平元年五月曲水縣麥秀三穗七月嘉  
禾生後苑一莖二十四穗百丈縣民李文寶禾生一莖十  
七穗八月蘇州解後園邠州民田並禾生合穗平夷縣民  
王義田禾兩穗合爲一化城縣民張羨田禾九穗二年五  
月華州麥秀三穗七月資官縣吏董昭羨禾一莖九穗

者各一棟洛二州嘉禾合穗彭城縣民張福先田粟一莖  
分四穗八月鄆縣趙範粟一莖九穗玄武縣民李知進田  
粟一莖上分五苗成二十一穗榆次縣民周貴田禾三莖  
共穗三年五月鄆縣海陵縣並麥秀二三穗七月真定府  
禾三莖一穗達州民李國清田禾一苗九穗八月辰州公  
田禾生一莖三穗者四隰州嘉禾合穗圖以獻四年八月  
舒州嘉禾生九月知河中府郭堯卿獻嘉禾合穗圖五年  
八月臨汾縣民吉遇洪洞縣民范思安田並禾生隔二隴  
上合爲一六年七月涉縣民連罕田隔四壠同穎銅梁縣  
民楊彥曾禾一莖九穗景德元年正月寧晉縣民耿待問

田禾合穗者三本知州王用和圖以獻二年七月獲鹿縣  
禾合穗八月滎陽縣及相州嘉禾異畝同穎九月并州貢  
嘉禾圖三年八月大名府滄州並嘉禾生真定府禾異畝  
同穎九月滎州禾一莖十八穗四年六月南雄州保昌民  
田禾一本九穗以圖來獻七月神泉縣民張篆田禾一苗  
九穗貝充二州嘉禾合穗九月衛德二州廣安軍並上嘉  
禾圖大中祥符元年曲水縣南鄭縣並麥秀二三穗七月  
乾封縣奉高鄉民田禾異壠同穎判州王欽若以聞八月  
鄆州獻嘉禾淳化縣民賀行滿田禾隔四壠相去四尺許  
合爲一穗新平縣民尹遇田禾合穗者二本真定府粟生

二穗九月澧州嘉禾一莖十穗號州團練使綦興獻合穗  
禾嘉州民潘德麟田禾二莖各九穗麟州嘉禾生二年六  
月簡州民集若寧家禾九穗七月黔州嘉禾異畝合穗八  
月嘉州解有一莖十四穗生庭中岐山縣禾異畝同穎知  
州施護以聞三年四月同州麥秀二三穗七月冀淄昭三  
州嘉禾多穗異畝同穎八月寧化軍嘉禾合穗寶鼎縣民  
張知友田禾隔四龍相去二尺許合穗判府陳堯叟以聞  
樓煩縣民田禾異本同穎劍州嘉禾生一莖九穗四年三  
月辛巳帝至西京福昌縣民朱懿文嘉禾一本七穗昌元  
縣民舒元晃田禾一莖九穗知州柴德方以聞金水縣民

田禾一莖三十六穗四月六安縣麥秀三三穗五月唐汝  
廬宿泗濠州麥自生八月蜀州禾一莖九穗長壽縣民常  
自天田禾合穗者二蒲縣禾異畝同穎九月知虢州李昭  
獻合穗禾五年四月遂州麥秀兩穗或三穗七月華州禾  
一莖兩穗真定府四縣嘉禾合穗八月京兆府嘉禾生九  
月巴州禾一莖二十二穗一莖十七穗六年三月邕州麥  
秀兩穗或三穗七月益州嘉禾九穗至十穗朝邑縣民田  
禾八莖同穎已未召近臣觀嘉穀于後苑有七穗至四十  
八穗繪以示百官八月龍門縣永定軍博野縣民田並嘉  
禾生合穗瀛州嘉禾生知州馮守信以聞忻州秀容定襄

二縣民田禾合穗保定軍公田大通監並嘉禾生九月京  
兆府獻長安縣嘉禾圖一枝雙穗七年通泉縣尉劉定辭  
官廨禾一本六穗邯鄲縣民馬乂田禾隔壠合穗者二本  
滁州榷酒署內禾一莖二穗晉原平原二縣民田禾並一  
本十二穗三月郾城縣麥秀兩穗三穗八月知亳州李迪  
獻禾一莖三穗至十穗府谷縣民劉善田禾隔三壠合成  
一穗嵐州牙吏燕清田禾一莖八穗一莖五穗遼州平城  
民田禾隔二壠合穗有十三本或二十一本合爲一者九  
月施州禾一莖九穗至十二穗真定貝州並嘉禾合穗八  
年湖陽縣麥秀兩穗三穗四月旭川縣民任慶和田禾一

莖九穗閏六月眉山縣民楊文繼邛州李義田禾並一莖  
九穗七月永靜軍禾隔壠合穗者二軍使仲甫以聞八月  
桂陽監民何文勝田粟一本二穗九年四月建初縣麥秀  
兩穗或三穗八月判大名府魏咸信獻合穗禾永靜軍阜  
城縣民田穀隔三壠合穗者二本廣州嘉禾生安化縣民  
吳景延田禾穗長尺五寸九月知鳳翔府趙湘知邠州王  
守斌並獻嘉禾圖天禧元年七月流江縣禾一莖九穗二  
年九月河北安撫副使張昭遠獻穀穗三各長尺餘資州  
禾一莖九穗三年七月饒陽縣民楊宣田禾二壠相去二  
尺許合爲一穗益州嘉禾一莖九穗四年八月內出玉宸

殿瑞穀圖示近臣每本有九穗十穗者九月鄭縣民岑貫  
田禾一莖九穗知州蘇維甫以聞五年四月河南府民田  
嘉禾合穗知府王欽若以聞七月導江縣民趙元賞青城  
縣民王偉田禾並一莖九穗乾興元年五月南劍州麥一  
本五穗歸州麥秀兩歧八月洋州嘉禾合穗十一月高陵  
縣嘉禾合穗天聖二年八月乙酉寧化軍嘉禾異畝同穎  
四年九月榮州禾一本九穗五年資州禾一本九穗六年  
忻州禾異本同穎五月乙未陳州瑞麥一莖二十穗六月  
陳州獻瑞麥圖七年七月河南府嘉禾合穗八年八月壬  
午召近臣觀瑞穀於元真殿九年膚施縣禾異畝同穎景

祐元年七月磁州嘉禾合穗八月大名府嘉禾合穗九月  
涇州磁州保德軍並嘉禾合穗十月孝感應城二縣稻再  
熟成德軍禾一本九穗三年九月榮州禾一莖九穗四年  
七月己巳臨清縣穀異畝同穎者六十本康定元年六月  
蜀州懷安軍並禾九穗慶曆二年壽安縣嘉禾合穗六年  
五月昭化縣禾一莖兩歧八月趙州懷州並嘉禾異畝同  
穎九月定襄縣嘉禾隔二龍莖合穗長江縣禾一莖十穗十  
二月石照諸縣野穀稽生七年九月邠州榮州德州並嘉  
禾合穗皇祐元年密州禾合穗者五本永康軍禾一莖九  
穗二年九月延州石州並嘉禾異畝合穗永康軍嘉禾一

莖九穗十二月密州禾十莖合一穗石州四莖合一穗三年五月彭山縣上瑞麥圖凡一莖五穗者數本帝曰朕嘗禁四方獻瑞今得西川麥秀圖可謂眞瑞矣其賜田夫束帛以勸之是月滁州麥一莖五穗四年八月嘉州蜀州並嘉禾一莖九穗九月南劍州有禾一本雙莖二十穗五年三月資州嘉禾一莖九穗閏六月資州麥秀兩歧七月鄆州祁州禾異畝同穎九月成德軍嘉禾異畝同穎綿州禾一莖九穗至和元年十二月蜀州嘉禾一莖九穗二年五月亳州麥秀兩歧六月應天府貢大麥一本七十穗小麥一本二百穗八月邛州嘉禾一莖九穗嘉祐三年六月綿

州麥一穗兩歧七月泰山上瑞麥圖凡五本五百一穗四年六月彰明縣有麥兩歧百餘本五年三月崇安縣嘉禾一本九十莖七年陵州禾一莖九穗九月平遙縣禾異畝合穗熙寧元年永興軍禾一莖四穗眉州禾一莖九穗四年乾寧軍禾合穗成德軍晉州汾州禾異龍同穗六年南溪縣禾一苗九穗八年懷安軍瀘州渠州各麥秀兩歧安喜縣禾二本間五莖合穗平山縣禾合穗者二保塞縣禾七本間一莖或兩莖合穗潞城縣禾合穗者二九年火山軍禾間五莖束鹿秀容二縣間四莖渤海縣皆異龍同穎流江縣禾一苗九穗譙縣麥一本三穗尉氏縣湖陽縣彭

城縣麥一本兩穗渠州大麥一穗兩歧或三歧四歧者陽  
翟縣麥秀兩歧天興寶雞二縣皆麥秀兩歧仍一本有三  
四穗或六穗者石州安州麥秀兩歧十年磁州禾合穗眉  
州禾生九穗亳州禾生二穗元豐元年武康軍禾一莖十  
一穗汝州禾合穗寧江軍禾一莖十穗邢州麥秀兩歧夔  
州麥一本三穗二年簡州安德軍麥秀兩歧曹州生瑞禾  
北京安武軍懷州鎮戎軍禾合穗鎮戎軍懷州禾皆異畝  
同穎袁州禾一莖八穗至十一穗皆層出長者尺餘府州  
禾異畝同穗三年眉州禾一本九穗齊州禾一莖五穗趙  
州禾二本合穗安州麥一本三穗至五穗凡十四莖深州

麥秀兩歧或三四穗凡四十畝眉州麥秀兩歧四年徐州  
麥一本百七十二穗代州禾合穗襄邑縣禾一本九穗五  
年高邑縣禾一莖五穗青州安肅軍憲州禾皆異畝同穎  
六年洪州七縣稻已蕩再生皆實威勝軍武鄉縣禾二本  
間五莖合穗歷城縣禾二本合穗趙州禾間三莖合穗唐  
州禾二穗者四瀘州禾九穗懷青濰三州禾皆異龍同穗  
府州陝州保平軍禾皆合穗七年蜀州禾生九穗青州禾  
異畝同穎者十一同州禾異畝同穎合州麥秀兩歧八年  
亳州麥一莖二穗一莖三穗一莖四穗鎮潼軍禾苗異  
莖同穗岷州禾皆四穗泰寧軍禾異本同穎者三是歲秋

冬保澤趙鄂隰滄灘密簡饒諸州威勝軍禾合穗或異畝  
同穎元祐元年簡州禾合穗石州禾異畝同穎二年忻隰  
磁灘懷州禾異畝同穎趙忻州禾合穗三年祁保彭州禾  
異畝同穎瀛磁代豐州安國軍禾合穗劍州安國軍麥秀  
兩歧夔州麥一本十二穗四年泰寧軍麥異畝同穎流江  
縣禾一本二穗榮德縣禾一本九穗青鄭濟趙州禾合穗  
及有一本三穗峨嵋縣禾異畝同穎又禾登一百五十三  
穗五年冀州安武軍大名府成德軍禾合穗永寧軍禾二  
本隔五莖合穗平定軍禾異畝同穗汀州禾生三十六穗  
劍州禾一本八穗普州麥一莖雙穗夔州麥秀五歧六年

汝陽縣美原縣兗州鄒縣麥一莖數穗南劍州粟一本三  
十九穗瀛定懷汝晉昌州平定永康軍禾合穗七年均充  
祁滄資華柳州禾合穗鄂州禾一本一枝兩穗三本三枝  
兩穗仙源縣禾異龍合穗耀州粟二莖隔兩龍合爲一穗  
梁山軍禾一莖九穗固始縣麥有雙穗定陶縣丹陽縣麥  
秀兩歧紹聖元年博野縣麥一本五穗漢陽軍麥秀兩歧  
樂壽縣麥一本兩穗或三穗懷安軍禾一本九穗二年青  
粱果冀德濱嵐濮達州禾合穗三年安武軍禾合穗嵐州  
禾兩根合穗者二普相青齊嵐州永康軍禾異畝同穎合  
秀至九穗泉州粟一本五穗八穗瑕丘縣武陟縣陝城小

溪四縣麥合穗良原縣沈丘縣長子縣麥秀兩歧四年河  
中府麥秀三穗虹縣雲安縣麥秀兩歧茂州一枝兩穗汶  
山縣一枝三穗至六穗西京鄆齊隰州禾合穗穎昌府禾  
一莖四穗至五穗元符元年慶州禾異本同穎青晉潞州  
荆南府永寧鎮戎軍等一十一處禾合穗邢州禾異龍合  
穗南劍州嘉州禾一莖九穗內鄉縣麥一莖兩穗符離靈  
壁臨渙蘄虹五縣麥秀兩穗兩當縣麥秀三穗安平縣生  
瑞麥二年漣水軍麥合穗鄧岷州鎮戎軍禾合穗十一月  
岷州宕昌砦生瑞麥建中靖國元年沛縣晉州禾合穗崇  
寧元年淄州禾合穗二年晉寧軍忻州禾合穗五年河南

府保德軍慶蘭潭冀府州岢嵐軍禾合穗淮西路民田既刈復生實大觀元年蜀州粟一莖九穗二年鞏州粟一莖六穗鎮潼軍隆德府保德軍慶蘭州禾合穗武信軍禾一莖九穗簡州麥秀兩歧三年武信軍瀘遂普州麥秀兩歧四年蔡州麥一莖兩歧至七八歧者九十畝九月尚書左僕射張商英表上袁州瑞禾圖及宋大雅彼脩者禾十有三章賜詔褒荅商英請并寫置中書省右僕射廳壁許之仍許三省樞密院同觀政和元年知河南府鄧洵武言秋禾大稔自雙穗至十穗以上嘉禾無雙榮州粟一莖九穗蔡州麥一莖兩歧或三五歧至八九畝近約十畝遠或連

野二年知定州梁士野奏嘉禾合穗一科相隔五龍計六尺三寸生爲一穗并中間龍內一科三莖上生粟三穗五年鄧州仙井監嘉禾合穗是冬台州進寧海縣早禾一稃二米者凡三石時方脩明堂遂協成典禮詔許拜表賀自是史官多記竒祥異瑞謂麥禾爲常事不書惟宣和末郭藥師言嘉禾合穗以新收復特書之

建隆二年七月南唐李景獻鳳翔雍熙四年十月知潤州程文慶獻鶴頸毛如垂纓端拱元年八月清遠縣廨舍有鳳集栢樹高六尺衆禽隨之東北去知州李昌齡圖以獻至道元年九月京師自旦至酉群鳥百餘萬飛翔有聲識

者云突厥雀景德元年五月庚寅午時白州有三鳳自東來入城中衆禽圍繞至萬歲寺棲百尺木上身長九尺高五尺文五色冠如金盃申時北向而去畫圖以聞大中祥符元年春昇州見黃雀群飛蔽日有從空墜者占主民有役事是歲火寶元二年長舉縣有白鵲觜脚紅不類常鵲治平四年五月太子右贊善大夫陳世脩獻白烏熙寧七年六月乙未增城縣鳳凰見元豐三年八月戊寅平棘縣獲白鵲九月丙午趙州獲白鳥六年七月壬申丹州生白雀至和三年九月大饗明堂有鶴回翔堂上明日又翔于上清宮是時所在言瑞鶴宰臣等表賀不可勝紀宣和元

年九月戊午蔡京等表賀赤鳥又賀白鵲政和後禁苑多爲村居野店又聚珍禽野獸鹿鶴鷺鷥禽鳥數百實其中至宣和間每秋風夜靜禽獸之音四徹宛若深山大澤陂野之間識者以爲不祥宣和末南郊禮畢御郊宮端誠殿天未明白辟方稱賀忽有鶴正鳴于殿屋若與贊拜聲相應和聞者駭之時已報女真背盟未踰月內禪明年有青城之難建炎三年高宗在揚州二月辛亥早朝有禽翠羽飛鳴行殿三匝一再止于宰臣汪伯彥朝冠冠尊服飛鳥踐之不祥翠羽又青祥也劉向以爲野鳥入宮宮室將空一曰敗亡之應是月金人入揚州有倉卒度江之變未

幾伯彥罷相尋坐賤四年正月丁巳金人圍陝州有鳶鴟  
數萬飛噪城上與戰聲相亂金將妻宿曰城當陷急攻之  
遂失守近羽孽也七年鳩鳴于劉豫後苑又群鳥鳴于內  
庭如曰休也豫惡之募人獲一梟者予錢五千是歲僞齊  
亡十七年二月有白鳥六集于高棋壇上府尹沈該以瑞  
奏二十七年饒州番陽縣有妖鳥鳬身鷄尾長喙方足赤  
目止于民屋數日彈矢不能中乾道六年邵武軍泰寧縣  
有雀飛鳴立死于瑞寧佛刹香爐先是紹興初是邑有雀  
立死于丹霞佛刹香爐皆羽孽也而浮圖氏因謂之雀化  
慶元三年春池州銅陵縣鴛鴦雄化爲雌

紹興五年江東西羊大疫十七年汀州羊無角嘉定九年  
信州玉山縣羊生駢首

端拱元年十一月戊午夜西北方有赤氣如日脚高二天  
咸平六年六月辛未赤氣出婁貫天庚占曰倉廩有火災  
景德三年三月丙辰北方赤氣亘天大中祥符三年十二  
月癸亥青赤氣貫紫微慶曆三年十二月二十六日天雄  
軍德博州天降紅雪盡血雨熙寧二年十一月每夕有赤  
氣見西北隅如火至人定乃滅元祐三年七月丁卯夜東  
北方明如晝俄成赤氣內有白氣經天建中靖國元年正  
月朔夕有赤氣起東北彌亘西方久之中出白氣二及赤

氣將散復有黑氣在其傍宣和元年四月丙子夜西北赤氣數十道亘天犯紫宮北斗仰視星皆若隔絳紗拆裂有聲間以白黑二氣自西北俄入東北延及東南迨曉乃止靖康元年九月戊寅有赤氣隨日出建炎元年八月庚午東北方有赤氣占曰血祥四年五月洞庭湖夜赤光如火見東北亘天俄轉東南北此血祥也壬子夜西北方有赤氣彌天貫以白氣如練者十數犯北斗文昌紫微由東南而散紹興七年正月乙酉夜北方有赤氣達旦辛卯斗牛間赤氣如火十一月癸卯南方有赤氣東北皆赤雲自日入至于甲夜八年九月甲申赤氣出紫微垣十八年八月丁

亥九月甲寅皆有赤氣如火二十年十一月建昌軍新城  
縣永安村大風雪夜半若數百千人行聲語笑歌哭雜擾  
勿遽而凝寒陰黑咫尺莫辨明旦雪中有人畜鳥獸蹄迹  
流血汙染十餘里入山乃絕二十七年三月乙酉赤氣出  
紫微垣七月壬申赤氣隨日入十月壬寅赤氣如火三十  
年二月壬申亦如之三十二年春淮水溢中有赤氣如凝  
血隆興二年十一月庚寅日入後赤雲隨之乾道元年八  
月壬午赤氣中天自日入至于甲夜六年十月庚午赤氣  
隨日出十一月丁丑赤雲隨日入至于甲夜七年七月壬  
寅十月乙巳丙午淳熙三年八月丁酉戊戌皆有赤氣隨

日出入十三年行都民家有血自地中出濺染汙人衣十四年十一月癸丑甲寅有赤氣隨日出入紹熙三年春潼川路久旱日月星皆有赤氣四年十一月甲戌赤雲夜見白氣間之慶元六年十月赤氣夜發橫天嘉泰四年二月庚辰夜有赤雲間以白氣東北亘天後八日國有大火占者以爲火祥嘉定六年十月乙卯赤氣隨日出十一月辛卯赤氣隨日入端平三年七月甲申天雨血寶祐二年蜀兩血

開寶七年六月棣州有火自空墜于城北有物如龍端拱元年九月瀘州鹽井竭遣匠劉晚入視忽有聲如雷火焰

突出晚被傷建炎元年正月辛卯夜西北陰雪中有如火  
光紹興三十一年建昌軍新城縣有巨室篋中時有火光  
燔衣帛過半而篋不焚近火孽也

志卷第十七

志卷第十八

宋史六十五

開封舊司上柱國錄畫國畫書有丞相監脩國事領經筵事都總裁臣脫脫等奉

敕修

五行三 木

曲直木之性也木失其性則爲妖祥舊說以狂咎木氷恒  
雨服妖龜孽雞禍青眚青祥之類皆屬之木今從之

太平興國六年正月瑞安縣民張度解木五片皆有天下  
太平字至道六年修昭應宮有木斷之文如點漆貫徹上  
下體若梵書十一月襄州民劉士家生木有文如龍魚鳳  
鶴之狀七年五月撫州修天慶觀解木有文如墨畫雲氣

峰巒人物衣冠之狀七月彰明縣崇仙觀柱有文爲道士  
形及北斗七星象大中祥符八年晉州慶唐觀古柏中別  
生槐長丈餘天聖元年二月河陽柳二本連理六月河陽  
櫃棗各連理五年正月綿谷縣松柏同本異幹九年十月  
公井縣冬青木連理明道元年八月黃州橘木及柿木連  
枝康定元年十月始興縣柑兩本連理慶曆三年十二月  
澧州獻瑞木有文曰太平之道六年九月甲辰登州有巨  
木浮海而出者三千餘治平四年六月汀州進桐木板二  
有文曰天下太平熙寧元年三月簡州木連理是歲英州  
因雷震一山梓樹盡枯而爲龍腦價爲之賤至京師一兩

纔直錢一千四百二年建州民楊緯言元年三月大雷雨  
所居之西有黃龍見下獲一木如龍而形未具七月大雷  
雨復有龍飛其下及霽木龍尾翼足皆具歸合舊木宛然  
一體圖象以進十年八月乙巳惠州柚木有文曰王帝萬  
年天下太平元豐元年五月劍州木連理三年六月己未  
饒州長山兩木子數畝狀類山芋子味香而辛土人以爲桂  
子又曰菩提子明道中嘗有之是歲大稔十二月泌陽縣  
甘棠木連理六年五月衛真縣洞霄宮枯槐生枝葉元祐  
元年八月己丑杭州民俞舉慶七世同居家園木連理五  
年四月德州木連理元符元年八月施州李木連理二年

九月眉山縣榦木二株異根同榦木枝相附崇寧四年正  
月襄城縣李梨木連理大觀元年三月湟州欄木生葉八  
月瑞州永興軍並木連理二年十二月岢嵐軍園池生瑞  
木政和三年七月玉華殿萬年枝木連理南雄州楓木連  
理十月武義縣木根有萬宋年歲四字四年建州木連理  
六月沅陵縣江漲流出楠木二十七可爲明堂梁柱蔡京  
等拜表賀九月丙申彭城縣柏開華十二月辛丑元氏縣  
民王寘屋柱槐木再生枝葉高四十餘尺是歲邵州海棠  
木連理澤州台州槐木連理荆門軍紫薇木連理六年坊  
充洪明夔徐新全隰太平州並木連理梅州枯木生枝宣

和二年四月永州民劉思折薪有天下太平字紹興十四  
年四月虔州民毀欹屋析柱木理有文曰天下太平時守  
臣薛弼上之方大亂近木妖也二十年八月福州冲虛觀  
阜莢木翠葉再實二十一年建德縣定林寺桑生李實栗  
生桃實占曰木生異實國主殃二十五年十月贛州獻太  
平木時秦檜擅朝喜飾太平郡國多上草木之妖以爲瑞  
紹興間漢陽軍有挿榴枝於石罅秀茂成陰歲有華實者  
初郡獄有誣服孝婦殺姑婦不能自明屬行刑者挿髻上  
華於石隙曰生則可以驗吾冤行刑者如其言後果生淳  
熙十六年三月揚州桑生瓜櫻桃生茄此草木互爲妖也

七月晉陵縣民析薪中有木字曰紹熙五年如是者二是時紹熙猶未改元其後果止五年此近木妖也紹熙四年富陽縣栗生來禽實五年行都兩木與唐志貞元陳留兩木同占木生于下而自上隕者將有上下易位之象嘉定六年五月己巳嚴州淳安遂安桐廬三縣大木自拔占曰木自拔國將亂景定四年五月成都太祖廟側大木仆忽起立生三芽德祐二年正月戊辰寶應縣民析薪中有天太下趙四字獻之制置使李庭芝賞以錢百千

咸平六年十一月庚戌雨木永大中祥符五年正月戊寅京師兩木兆天禧五年正月戊寅京師兩木兆慶曆三年

十二月丁巳雪木氷占曰兵象也嘉祐元年正月兩木氷  
治平二年十月乙巳兩木氷熙寧三年十月八年正月九  
年正月京師兩木氷元祐八年二月京師大寒霰雪兩木  
氷宣和五年十月乙酉兩木氷靖康元年十月乙卯兩木  
氷二年正月丁酉兩木氷紹熙五年十一月辛亥兩木氷  
宣和六年御樓觀燈時開封尹設次以彈壓於觀下帝從  
六宮於其上以觀天府之斷決者簾幕深密下無由知衆  
中忽有人躍出墨色布衣若寺僧童行狀以手畫簾出指  
斥語執于觀下帝怒甚令中使傳旨治之蓋掠亂下又加  
炮烙詢其誰何略不一語亦無痛楚之狀又斷其足筋俄

施刀彎血肉狼籍帝大不悅爲罷一夕之懼竟不得其何人付獄盡之七年八月都城東門外鬻菜夫至宣德門下忽若迷罔釋荷擔向門戟手出悖詈語且曰太祖皇帝神宗皇帝使我來道尚宜速改也邇卒捕之下開封獄一夕方省則不知向者所爲者乃於獄中盡之建炎二年十一月高宗在揚州郊祀後數日有狂人具衣冠執香爐攜絳囊拜于行宮門外自言天遣我爲官家兒書于囊紙刻於右臂皆是語鞠之不得姓名高宗以其狂釋不問明年二月金人犯淮揚三月有明受之變紹興元年四月庚辰閩州有狂僧襄經哭于郡譙門曰今日佛下世且言且哭實

隆祐太后上仙曰云閻距行都萬里逾月而遺詔至淳熙  
十四年正月紹興府有狂人突入恩平郡王第升堂踐王  
坐曰我太上皇孫來赴郡鞠訊終不語亦狂咎也是冬高  
宗崩明年八月王薨紹熙二年十二月庚辰昧爽成都府  
有人裹服入帳門大呼閻帥京鎧姓名亦狂咎也

建隆元年十月蔡州大霖雨道路行舟開寶二年八月帝  
駐潞州積雨累日未止九月京師大雨霖五年京師雨連  
旬不止河南河北諸州皆大霖兩九年秋大霖兩太平興  
國二年道州春夏霖雨不止平地二丈餘五年五月京師  
連旬雨不止七年六月齊州逮捕臨邑尉王坦等六人繫

獄未具一夕大風雨壞獄戶王坦等六人並壓死雍熙二年八月京師大霖雨淳化元年六月隴城縣大霖壞官私廬舍殆盡溺死者百三十七人三年九月京師霖雨四年七月京師大雨十晝夜不止朱雀崇明門外積水尤甚軍營廬舍多壞是秋陳穎宋亳許蔡徐濮澶博諸州霖雨秋稼多敗五年秋開封府宋亳陳穎泗壽鄧蔡潤諸州雨水害稼咸平元年五月昭州大霖害民田溺死者百五十七人景德三年八月青州大霖壞鼓角樓門壓死者四人大中祥符二年八月無爲軍大風雨折木壞城門軍營民舍壓溺千餘人十月兗州霖雨害稼三年四月昇州霖雨

五月辛丑京師大雨平地數尺壞軍營民舍多壓者近畿  
積潦五年九月建安軍大霖雨害農事天禧四年七月京  
師連雨彌月甲子夜大雨流潦汎溢民舍軍營圮壞太半  
多壓死者自是頗雨及冬方止乾興元年二月蘇湖秀州  
兩壞民田天聖四年六月戊寅莫州大雨壞城壁七年自  
春涉夏雨不止明道二年六月癸丑京師雨壞軍營府庫  
景祐三年七月庚子大雨震電慶曆六年七月丁亥河東  
大雨壞忻代等州城壁皇祐二年八月深州大雨壞民廬  
舍四年八月癸未京城大風雨民廬摧圯至有壓死者嘉  
祐二年八月河北緣邊久雨瀕河之民多流移五月丁未

晝夜大兩六月乙亥雨壞太社太稷壇三年八月霖雨害稼六年七月河北京西淮南雨浙江南東西霪雨爲災閏八月京師久雨是歲頻雨及冬方止治平元年京師自夏歷秋久雨不止推真宗及穆獻懿三后陵臺熙寧元年八月冀州大兩壞官私廬舍城壁七年六月陝州大兩漂溺陝平陸二縣元豐四年七月泰州海風駕大兩漂浸州城壞公私舍數千楹元祐二年七月丁卯以雨罷集英殿宴元符二年九月以久雨罷秋宴三年七月久雨哲宗大昇輦在道陷泥中建中靖國元年二月久雨時欽聖憲肅皇后欽慈皇后二陵方用工詔京西祈晴崇寧元年七月久

雨壞京城廬舍民多壓溺而死者三年六月久雨四年五月京師久雨又自七月至九月所在霖雨傷稼十月始霽靖康元年四月京師大雨天氣清寒又自五月甲申至六月暴雨傷麥夏行秋令建炎二年春淫雨三年二月癸亥高宗初至杭州久霖雨占曰陰盛下有陰謀時苗傅劉正彥爲亂五月霖雨夏寒紹興元年行都雨壞城三百八丈是歲婺州雨城壞三年雨自正月朔至于二月七月四川霖雨至于明年正月四年六月淫雨害稼蘇湖二州爲甚九月久雨時劉豫連金人入寇十月高宗親征而霖五年三月霖雨傷蠶麥行都雨甚九月雨至于明年正月六

年五月久雨不止七年十月高宗如建康久雨八年三月  
積雨至于四月傷蠶麥害稼二十一年夏襄陽府大雨十  
餘日二十三年六月大雨壞軍壘民田三十年五月久雨  
傷蠶麥害稼八月施州大風雨三十二年六月浙西大霖  
雨隆興元年三月霖雨行都壞城三百三十餘丈二月六  
月陰雨七月浙西江東大雨害稼八月風雨踰月乾道元  
年二月行都及越湖常潤溫台明處九郡寒敗首種損蠶  
麥二年正月淫雨至于四月夏寒江浙諸郡損稼蠶麥不  
登三年五月丙午泉州大雨晝夜不止者旬日八月淫雨  
江浙淮閩禾麻菽麥粟多腐四年四月陰雨彌月六年

五月連雨六十餘日十一月連雨辛巳郊祀雲開于圜丘  
百步外有澍雨八年四月四川陰雨七十餘日六月壬寅  
大雨徹晝夜至于己酉九年閏正月淫雨淳熙二年夏建  
康府霖雨壞城郭三年五月淮浙積雨損禾麥八月浙東  
西江東連雨癸未甲申行都大風雨九月久雨十月癸酉  
孝宗出手詔決獄援筆而風起開霽四年九月丁酉戊戌  
紹興府餘姚上虞二縣大風雨五年閏六月己亥階州暴  
雨至于戊申乙巳興化軍福州福清縣暴雨夜作六年  
四月衢州霖雨九月連雨己巳將郊而霽八年四月雨腐  
禾麥五月久雨敗首種十年五月信州霖雨自甲戌至于

辛巳八月福州大雨霖自已未至于九月乙丑吉州亦如之十一年四月淫雨戊寅建康府太平州大雨霖六月甲申處州龍泉縣暴雨十二年五月六月皆霖雨十三年秋利州路霖雨敗禾稼種稑金洋階成岷鳳六州亦如之十五年五月荆淮郡國連雨戊午祈門縣霖雨十六年四月西和州霖雨害禾麥五月浙西北福建淮東利西諸道霖雨紹熙元年春久陰連雨至于三月夏階成岷鳳四州十丈圮城樓敵樓凡十五所四月福建路霖雨至于五月七月利路久雨傷種麥癸亥興州暴雨連日八月行都久

雨三年五月江東湖北路連雨常德府大雨徹晝夜自壬  
辰至于庚子寧國府池州廣德軍自己亥至于六月辛丑  
朔雨甚祈門縣至于庚戌七月壬申天台仙居二縣大雨  
連旬淮西路鎮江襄陽府皆害禾麥八月普州雨害稼四  
年四月霖雨至于五月浙東西江東湖北郡縣壞圩田害  
蠶麥蔬稑紹興寧國府尤甚鎮江府大雨自辛未至于丙  
子淮西郡縣自丙子至于戊寅五年八月霖雨畿縣浙東  
西皆害稼九月雨至于十月癸巳大雨三晝夜不止江東  
西福建郡縣皆苦雨慶元元年正月霖雨甲辰帝蔬食露  
禱丙午霽二月又雨至于三月傷麥五月霖雨七月雨至

于八月二年六月壬申台州焱風暴雨連夕八月行都霖  
雨五十餘日三年七月雨連月四年八月久雨五年五月  
行都雨壞城夜壓附城民廬多死者六月浙東西霖雨至  
于八月六年五月庚午嚴州霖雨連五晝夜不止嘉泰二  
年六月福建路連雨至于七月丁未大風雨爲災三年八  
月久雨開禧元年七月利路郡縣霖雨害稼閏月盱眙軍  
陰雨至于九月敗禾穗十月行都淫雨至于明年春二年  
春淫雨至于三月嘉定二年五月戊戌連州大雨連晝夜  
六月利闐成西和四州霖雨七月壬辰台州大風雨夜作  
三年三月陰雨六十餘日五月淫雨至于六月首種多敗

蠶麥不登四年八月霖雨至于九月五年春淫雨至于三  
月傷蠶麥十一月雨雪積陰至于明年春六年春淫雨至  
于二月丁亥雨雪集霰五月陰雨經日辛酉嚴州霖雨六  
月戊子紹興府大風雨浙東西雨至于七月七年九月陰  
雨至于十月害禾麥九年四月六月大霖雨浙東西郡縣  
尤甚十年三月連雨至于四月十月霖雨害稼十一年六  
月霖雨浙西郡縣尤甚十二年六月霖雨彌月十五年七  
月浙東西霖雨爲災十六年五月霖雨浙西北江東淮  
東尤甚八月大風雨害稼十七年八月霖雨

乾德四年二月長春節甘露降江寧府報恩院五年二月

甘露降江陵府玉泉寺松樹開寶元年十二月甘露降蔡州僧院柏樹太平興國三年正月甘露降壽州廨四年五月甘露降河東縣廨叢竹凡三夜七年四月丙戌知漢州安守亮獻柏葉上甘露一器九年三月丙子甘露降西京南太一宮新城雍熙三年四月庚子甘露降後院草木四年十二月甘露降興化軍羅漢峯前五松端拱二年二月甘露降壽州廨園柏及資聖寺檜淳化二年十二月資州廨及延壽觀德純寺甘露降松柏凡六日三年正月舒州二月衢州四月舒州四年六月舒州並甘露降至道二年四月蘄州三年五月泉州六月蘇州甘露降咸平元年四

月甘露降平戎軍廨果樹凡九十餘本十一月甘露降亳  
州真觀靈寶柏樹二年五月太平州潯州三年二月泉州  
十一月潯州四年二月龔州五年正月桂州十一月許州  
並甘露降景德元年義寧縣二年正月鬱林州二月晉州  
及神山縣三年正月梓州四月遂州十二月榮州懷安軍  
甘露降大中祥符元年十二月上饒縣信陽軍二年正月  
信陽軍陳鄂二州三月陵昇梓三州三年二月柳州懷安  
軍閏二月富順監五月澤耀晉益四州四年正月梓州三  
月澤州四月常州五年四月遂州五月無爲軍六月梓州  
七月真定府十一月榮州開元寺六年三月梓州六月鄜

州八月遂州九月信州十月亳州太清宮十一月潯州十二月榮州南儀州七年二月鳳翔府天慶觀五月鄆州十月亳州太清宮十一月彭州天慶觀八年正月中江縣二月果州十月衢州九年十一月玉清昭應宮並甘露降天禧元年正月貴州天慶觀二月玉清昭應宮三月後苑四月會靈觀五月廬州通判廳及后土祠十二月昭州天慶觀二年十二月榮州開元寺懷安軍天慶觀三年四月舒州五月益州四年三月邵武軍十二月平泉縣五年三月泉州十一月韶州並甘露降天聖元年正月柳州十一月河南府二年五月鳳州十月涇州四年榮州懷安軍六年太

平州七年正月益州九年正月榮州並甘露降明道元年  
十一月韶州梓州甘露降景祐四年十二月成德軍慶曆  
四年正月桂州皇祐三年十二月吉州嘉祐七年三月眉  
州蓬州九月陵州並甘露降熙寧元年距元豐八年甘露  
降凡二十餘處元祐元年距元符三年亦如之大觀初甘  
露降于九成宮帝鼐室三年冬降于尚書省及六曹御製  
七言四韻詩賜執政已下其後內自禁中及宣和殿延福  
宮神霄宮下至三學開封府大理寺宰臣私第皆有之歲  
歲拜表稱賀

建隆初蜀孟昶末年婦女競治髮爲高髻號朝天髻未幾

祖入朝京師江南李煜末年有衛士秦友登壽昌堂榻覆其輶而坐訊之風狂不寤識者云輶履也李氏將覆於此地而爲秦所有乎履與李友與有同音趙與秦同祖也又煜宮中盛雨水染淺碧爲衣號天水碧未幾爲王師所克辛女至京師猶有服之者天水國之姓望也淳化三年京師里巷婦人競剪黑光紙團脣又裝鏤魚腮中骨號魚媚子以飾面黑北方色魚水族皆陰類也面爲六陽之首陰侵於陽將有水災明年京師秋冬積雨衢路水深數尺景德四年春京城小兒裂裳爲小兒旗繫竿首相對揮颭兵鬪之象也是歲宜州卒陳進爲亂出師討平之紹興二十

一年行都豪貴競爲小青蓋飾赤油火珠於蓋之頂出都  
門外傳呼于道珠者乘輿服御飾升龍用焉臣庶以加于  
小蓋近服妖亦僭咎也二十三年士庶家競以胎鹿皮製  
婦人冠山民採捕胎鹿無遺時去宣和未遠婦人服飾猶  
集翠羽爲之近服妖也二十七年交趾貢翠羽數百命焚  
之通衢立法以禁紹熙元年里巷婦女以琉璃爲首飾唐  
志琉璃釵釧有流離之兆亦服妖也後連年有流徙之厄  
理宗朝宮妃繫前後掩裙而長窣地名趕上裙梳高髻於  
頂曰不走落束足纖直名快上馬粉點眼角名淚妝剔削  
童髮必留大錢許於頂左名偏頂或留之頂前束以綵繒

究若博焦之狀或曰鵠角咸淳五年都人以碾玉爲首飾有詩云京師禁珠翠天下盡琉璃

太平興國三年二月鑿金明池既掘地有龜出殆踰萬數大中祥符二年四月有黑龜甚衆沿汴水而下至和元年二月信州貢綠毛龜大觀元年閏十月丙戌都水使者趙霆行河得兩首龜以爲瑞蔡京信之曰此齊小白所謂象罔見之而霸者也鄭居中曰首豈容有二而京主之意殆不可測帝命棄龜金明池政和四年瑞州進六目龜五年博州進白龜紹興八年五月汴京太康縣大雷雨下冰龜數十里隨大小皆龜形具首足卦文乾道五年舒州民獻

龜駢生二首不能伸縮郡守張棟縱之瀟山近龜孽也嘉定十四年春楚州境上龜大小死者蔽野


咸平三年八月黃州羣雞夜鳴至冬不止紹興初陳州民家雞忽人言近雞禍也松陽縣民家雞生三足縣治有雞伏卵毛生殼外近雞禍亦毛孽也乾道六年西安縣官塘有物雞首人身高丈餘晝見于野慶元三年饒州軍營雞卵出地近雞孽亦蛇孽也婺源縣張村民家雌雞化爲雄烹之形冠距而腹卵孕同里洪氏家雄雞伏子中一雛三足咸淳五年常州雞羽生距

建隆元年夏相金均房商五州鼠食苗二年五月商州鼠

食苗乾德五年九月金州鼠食苗太平興國七年十月岳  
州鼠害稼紹興十六年清遠翁源真陽三縣鼠食稼千萬  
爲群時廣東久旱凡羽鱗皆化爲鼠有獲鼠於田者腹猶  
蛇文魚者夜設網旦視皆鼠自夏徂秋爲患數月方息歲  
爲饑近鼠妖也乾道九年隆興府鼠千萬爲群害稼淳熙  
五年八月淮東通泰楚高郵黑鼠食禾既歲大饑時江陵  
府郭外羣鼠多至塞路其色黑白青黃各異爲車馬踐死  
者不可勝計踰三月乃息紹熙四年饒州民家二小鼠食  
牛角三徒牛牢不免角穿肉瘠以斃近鼠妖也慶元元年  
六月番禺縣民家一猫帶數十鼠行止食息皆同如母子

相哺者民殺猫而鼠舐其血鼠象盜貓職捕而反相與同處司盜廢職之象也與唐龍朔洛州貓虎同占

紹興三年八月辛亥尚書省後樓無故自壞慶元元年夏建昌軍民居木柱有聲如牛鳴者三日乃止咸淳九年丞相賈似道起復之日在越上私第方拜家廟忽聞內有裂帛聲衆賓愕然密詢左右知家廟棟裂皆逡巡而退





志卷第十九

宋史六十六

校修

五行四金

從革金性也金失其性則爲變怪舊說以僭咎恒陽詩妖民訛毛蟲之孽白眚白祥之類皆屬之金今從之

建隆二年七月晉州神山縣北谷中有鐵隨水流出方二丈三尺其重七千斤太平興國四年九月夾江縣民王詣得黑石二皆丹文其一云君王萬歲其二云趙二十一帝緘其石來獻至道二年二月桂陽監鎔銀自涌成山峰狀

咸平四年十二月亳州太清宮鍾自鳴乾興元年四月甲戌修奉山陵總管言皇堂隧道穿得銅鍋有兩耳又於寢宮三門下穿得銅盂一鐵甕一鐵甲葉三天聖元年三月庚辰涪陵縣相思寺夜有光出阿育王塔之舊址發之得金銅像三百二十七五年七月壬寅遼山縣舊河凌地摧塔獲古錢一百四十六千五百四十三文明道元年五月壬午漢州江岸獲古鍾一慶曆四年五月乙亥金谿縣得生金山重三百二十四兩皇祐四年乾寧軍漁人得小鍾二於河濱五年二月己亥乾寧軍又進古鍾一至和二年四月甲午瀏陽縣得古鍾一熙寧元年至元豐元年橫州

共獲古銅鼓一十七元豐三年八月岳州永慶寺獲銅鍾  
一銅磬二六年南溪縣穿土得銅錢五萬四千有奇七年  
三月筠州獲古銅鍾一十一月賓州獲銅鼓一八年昌元  
縣通鹽井得銅鍋九銅盆一銅盤一崇寧五年十月荆南  
獲古銅鼎政和二年玄圭始出晉州上一石綠色方三尺  
餘當中有文曰堯天正其字如掌大而端楷類手畫者堯  
字居右天正字綴行于左都堂驗視礪石三分而字畫愈  
明又於堯字之下隱約出一瑞字位置始均蓋曰天正堯  
瑞云或謂晉陽堯都也方玄圭出乃有此瑞四年府畿汝  
蔡之間連山大小石皆變爲瑪瑙尚方取爲寶帶器玩甚

富五年正月湖南提舉常平劉欽言蘆荻衝出生金重九  
斤八兩狀類靈芝祥雲又淘得碎金四百七兩有奇十一  
月越州民拾生金湟州丁羊谷金坑僅千餘眼得鑛成金  
共四等計一百三十四兩有奇重和元年十二月孝感縣  
楚令尹子文廟獲周鼎六宣和四年後御府所藏往往復  
變爲石而色類白骨此與周寶圭占略同五年滎陽縣賈  
谷山麒麟谷采石修明堂得一石有文曰明百官表賀五  
年四月又獲虧鼎三崇寧四年三月鑄九鼎用金甚厚取  
九州水土內鼎中旣奉安於九成宮車駕臨幸徧禮焉至  
北方之寶鼎忽漏水溢于外劉炳謬曰正北在燕山今寶

鼎但取水土於雄州境宜不可用其後竟以北方致亂建  
炎元年南京留守朱勝非夜防城見南門外火光燭地掘  
之得銅印有文曰朱勝私印火鑠金金所畏也後拜相有  
明受之變卒坐貶三年吉州修城役夫得髑髏棄水中俄  
浮一鍾有銘五十六字大略云唐興元吾子沒瘞廬陵西  
壘後當火德五九之際世衰道敗浙梁相繼喪亂章貢康  
昌之曰吾亦復出是邦東平鳩工復使吾子同河伯聽命  
水官郡守命錄其辭錄畢而鍾自碎

紹興十一年三月庚申長安兵刃皆生火光二十六年郢  
縣地出銅馬高三尺制作精好風雨夜嘶紹興中耕者得

金甕重二十四鈞於秦檜別業乾道二年三月丙午夜福  
清縣石竹山大石自移聲如雷石方可九丈所過成蹊才  
四尺而山之木石如故

慶元二年十二月吳縣金鵝鄉銅錢萬百自飛

建隆二年京師夏旱冬又旱三年京師春夏旱河北大旱  
霸州苗皆焦仆又河南河中府孟澤濮鄆齊濟滑延隰宿  
等州並春夏不雨四年京師夏秋旱又懷州旱乾德元年  
冬京師旱二年正月京師旱夏不雨是歲河南府陝虢麟  
博靈州旱河中府旱甚四年春京師不雨江陵府華州漣  
水軍旱五年正月京師旱秋復旱開寶二年夏至七月京

師不雨三年春夏京師旱邠州夏旱五年春京師旱冬又  
旱六年冬京師旱七年京師春夏旱冬又旱河南府晉解  
州夏旱滑州秋旱八年春京師旱是歲關中饑旱甚太平  
興國二年正月京師旱三年春夏京師旱四年冬京師旱  
五年夏京師旱秋又旱六年春夏京師旱七年春京師旱  
孟號絳密瀛衛曹淄州旱九年夏京師旱秋江南大旱雍  
熙二年冬京師旱三年冬京師旱四年冬京師旱端拱二  
年五月京師旱秋七月至十一月旱上憂形於色蔬食致  
禱是歲河南萊登深冀旱甚民多飢死詔發倉粟貸之淳  
化元年正月至四月不雨帝蔬食祈雨河南鳳翔大名京

兆府許滄單汝乾鄭同等州旱二年春京師大旱三年春  
京師大旱冬復大旱是歲河南府京東西河北河東陝西  
及毫建淮陽等三十六州軍旱四年夏京師不雨河南府  
許汝亳滑商州旱五年六月京師旱至道元年京師春旱  
二年春夏京師旱咸平元年春夏京畿旱又江浙淮南荆  
湖四十六軍州旱二年春夏京師旱甚又廣南西路江浙荆  
湖及曹單嵐州淮陽軍旱三年春夏京師旱江南頻年旱四  
年京畿正月至四月不雨景德元年京師夏旱人多渴死  
三年夏京師旱大中祥符二年春夏京師旱河南府及陝  
西路潭邢州旱三年夏京師旱江南諸路宿州潤州旱八

年京師旱九年秋京師旱大名府澶州相州旱天禧元年  
京師春旱秋又旱夏陝西旱四年春利州路旱夏京師旱  
五年冬京師旱天聖二年春不雨五年夏秋大旱六年四  
月不雨明道元年五月畿縣久旱傷苗二年南方大旱景  
祐三年六月河北久旱遣使詣北嶽祈雨慶曆元年九月  
丁未朔遣官祈雨二年六月戊寅祈雨三年遣使詣嶽瀆  
祈雨四年三月丙寅遣內侍兩浙淮南江南祠廟祈雨五  
年二月詔天父不雨令州縣決淹獄又幸大相國寺會靈  
觀天清寺祥源觀祈雨六年四月壬申遣使祈雨七年正  
月京師不雨二月丙寅遣官嶽瀆祈雨三月辛丑酉太乙

宮祈雨皇祐元年五月丁未遣官祈雨三年恩冀諸州旱  
三月分遣朝臣詣天下名山大川祠廟祈雨至和二年四  
月甲午遣官祈雨嘉祐五年梓州路夏秋不雨七年三月  
甲子罷春燕以久旱故也辛丑西太乙宮祈雨治平元年  
春京師踰時不雨鄭滑蔡汝穎曹濮洛磁晉耀登等州河  
中府慶成軍旱二年春不雨熙寧二年三月旱甚三年諸  
路旱六月畿內旱八月衛州旱五年五月北京自春至夏  
不雨七年自春及夏河北東陝西京東西淮南諸路久  
旱九月諸路復旱時新復洮河亦旱羌戶多殍死八年四  
月真定府大旱八月淮南兩浙江南荆湖等路旱九年八

月河北京東京西河東陝西旱十年春諸路旱元豐二年  
春河北陝西京東西諸郡旱三年春西北諸路旱五年亢  
旱六年夏畿內旱元祐元年春諸路旱正月帝及太皇太  
后車駕分日詣寺觀禱雨是冬復旱二年春旱三年秋諸  
路旱京西陝西尤甚四年春京師及東北旱罷春燕八年  
秋旱紹聖元年春旱踈決四京畿縣囚三年江東大旱溪  
河涸竭四年夏兩浙旱元符元年東南旱二年春京畿旱  
建中靖國元年衢信等州旱大觀二年淮南江東西諸路  
大旱自六月不雨至于十月政和元年淮南旱三年江東  
旱四年旱詔振德州流民宣和元年二月詔汝穎陳蔡州

飢民流移常平官勒停秋淮南旱四年東平府旱五年夏  
秦鳳路旱是歲燕王府路旱建炎二年夏旱紹興二年常  
州大旱帝問致旱之由中書舍人胡交修奏守臣周祀殘  
酷所致尋以屬吏坐贓及殺不辜竄嶺南三年四月旱至  
于七月帝蔬食露禱乃雨五年五月浙東西旱五十餘日  
六月江東湖南旱秋四川郡國旱甚六年夔潼成都郡縣  
及湖南衡州皆旱七年春旱七十餘日時帝將如建業隨  
所在分遣從臣有事于名山大川六月又旱江南尤甚八  
年冬不雨九年六月旱六十餘日有事于山川十一年七  
月旱戊申有事于獄瀆乙卯禱雨于圜丘方澤宗廟十二

年三月旱六十餘日秋京西淮東旱十二月陝西旱十八  
年浙東西旱紹興府大旱十九年常州鎮江府旱二十四  
年浙東西旱二十九年二月旱七十餘日秋江浙郡國旱  
三十年春階成鳳西和州旱秋江浙郡國旱浙東尤甚隆  
興元年江浙郡國旱京西大旱二年台州春旱興化軍漳  
福州大旱首種不入自春至于八月乾道三年春四川郡  
縣旱至于秋七月縣劖漢州石泉軍尤甚四年夏六月旱  
帝將撤蓋親禱于太乙宮而雨時襄陽隆興建寧亦旱八  
月詔頒皇祐祀龍法于郡縣五年夏秋淮東旱盱眙淮陰  
爲甚六年夏浙東福建路旱溫台福漳建爲甚七年春江

西東湖南北淮南浙婺秀州皆旱夏秋江洪筠潭饒州南康興國臨江軍尤甚首種不入冬不雨九年婺處溫台吉贛州臨江南諸軍江陵府皆久旱無麥苗淳熙元年浙東湖南郡國旱台處郴桂爲甚蜀關外四州旱二年秋江淮浙皆旱紹興鎮江寧國建康府常和滁真揚州盱眙廣德軍爲甚三年夏常昭復隨郢金洋州江陵德安興元府荆門漢陽軍皆旱四年春襄陽府旱首種不入五年常潯州鎮江府及淮南江東西郡國旱有事于山川群望六年衡永楚州高郵軍旱七年湖南春旱諸道自四月不雨行都自七月不雨皆至于九月紹興隆興建康江陵府台婺常

潤江筠撫吉饒信徽池舒蘄黃和濤衡永州興國臨江南  
康無爲軍皆大旱江筠徽婺州廣德軍無錫縣尤甚禱兩  
于天地宗廟社稷山川群望八年正月甲戌積旱始兩七  
月不雨至于十一月臨安鎮江建康江陵德安府越婺衢  
嚴湖常饒信徽楚郢復昌州江陰南康廣德興國漢陽信  
陽荆門長寧軍及京西淮郡皆旱九年夏五月不雨至于  
秋七月江陵德安襄陽府潤婺溫處洪吉撫筠袁潭鄂復  
恭合昌普資渠利閩忠涪萬州臨江建昌漢陽荆門信陽  
南平廣安梁山軍江山定海象山上虞嵊縣皆旱十年六  
月旱至于七月江淮建康府和州興國軍恭涪瀘合金州

南平軍旱十一年四月不雨至于八月興元府吉贛福泉  
汀漳潮梅循邕賓象金洋西和州建昌軍皆旱興元吉尤  
甚冬不雨至于明年二月十四年五月旱六月戊寅有事  
于山川羣望甲甲帝親禱于太乙宮七月己酉大雩于圜  
丘望于北郊有事于嶽瀆海凡山川之神時臨安鎮江紹  
興隆興府嚴常湖秀衢婺處明台饒信江吉撫筠袁州臨  
江興國建昌軍皆旱越婺台處江州興國軍尤甚至于九  
月乃雨十五年舒州旱紹熙元年重慶府蘄池州旱二年  
五月真揚通泰楚滁和普隆涪渝遂高郵盱眙軍富順監  
皆旱簡資榮州大旱三年夏郢揚和州大旱秋簡資普榮

叙隆富順監亦大旱四年縣州大旱亡麥簡資普渠合州  
廣安軍旱江浙自六月不雨至于八月鎮江江陵府婺台  
信州江西淮東旱五年春浙東西自去冬不雨至于夏秋  
一鎮江府常秀州江陰軍大旱廬和濠楚州爲甚江西七郡  
亦旱慶元二年五月不雨三年潼利夔路十五郡旱自四  
月至于九月金蓬普州大旱四月壬子禱于天地宗廟社  
稷六年四月旱五月辛未禱于郊丘宗社鎮江府常州大  
旱水竭淮郡自春無雨首種不入及京襄皆旱嘉泰元年  
五月旱丙辰禱于郊丘宗社戊辰大雩于圜丘浙西郡縣  
及蜀十五郡皆大旱二年春旱至于夏秋七月庚午大雩

于圜丘祈于宗社浙西南江東旱鎮江建康府常秀潭  
永州爲甚四年五月不雨至于七月浙東西江西郡國旱  
開禧元年夏浙東西不雨百餘日衢婺嚴越鼎澧忠涪州  
大旱二年南康軍江西湖南北郡縣旱三年二月不雨五  
月己丑禱于郊丘宗社嘉定元年夏旱閏月辛卯禱于郊  
丘宗社二年夏四月旱首種不入庚申禱于郊丘宗社六  
月乙酉又禱至于七月乃雨浙西大旱常潤爲甚淮東西  
江東湖北皆旱四年資普昌合州旱六年五月不雨至于  
七月江陵德安漢陽軍旱八年春旱首種不入四月乙未  
禱于太乙宮庚子命輔臣分禱郊丘宗社五月庚申大雩

于園丘有事于嶽瀆海至于八月乃雨江浙淮閩皆旱建  
康寧國府衢婺溫台明徽池真太平州廣德興國南康盱  
眙安豐軍爲甚行都百泉皆竭淮甸亦然十年七月不雨  
帝日午曝立禱于宮中十一年秋不雨至于冬淮郡及鎮  
江建寧府常州江陰廣德軍旱十四年浙閩廣江西旱明  
台衢婺溫福贛吉州建昌軍爲甚十五年五月不雨岳州  
旱嘉熙元年夏建康府旱三年旱四年江浙福建旱淳祐  
七年旱十一年閩廣及饒州旱咸淳六年江南大旱十年  
廬州旱長樂福清二縣大旱

建隆中京師士庶及樂工少年競唱歌曰五來子自建隆

開寶凡平荆湖川廣江南五國皆來朝時西川孟昶賦歛無度射利之家配率尤甚既乏緡錢唯仰在質物乃競書簡札揭於門曰今召主收贖又每歲除日命翰林爲詞題桃符正旦置寢門左右末年學士幸寅遜撰詞相以其非工自命筆題云新年納餘慶嘉節號長春相以其年正月降王師即命呂餘慶知成都府而長春乃太祖誕聖節名也召與趙贍與蜀同音開寶初廣南劉鋹令民家置貯水桶號防火大桶又鋹末年童謠曰羊頭二四白天雨至後王師以辛未年二月四日擒鋹識者以爲國家以火德王房爲宋分羊未神也兩者王師如時雨之義也防與房桶

與宋同音周廣順初江南伏龜山圮得石函長二尺廣八寸中有鐵銘云維天監十四年秋八月葬寶公于是銘有引曰寶公嘗爲偈大事書于版帛幕之人欲讀之者必施數錢乃得讀訖即幕之是時名士陸倕王鈞姚察而下皆莫知其旨或問之云在五百年後至卒乃歸其銘同葬焉銘曰莫問江南事江南自有馮乘鷄登寶位跨犬出金陵子建司南位安仁秉夜燈東隣家道闕隨虎遇明興其字皆小篆體勢完具徐鉉徐鍇韓熙載皆不能解及煜歸朝好事者云煜丁酉年襲位即乘鷄也開寶八年甲戌江南國滅是跨犬也當王師圍其城而曹彬營其南是子建司

南位潘羨營其北是安仁秉夜燈也其後太平興國三年淮海王錢倅舉國入觀即東隣也家道闕意無錢也隨虎遇戊寅年也皇祐五年正月戊午狄青敗儂智高于歸仁鋪初謠言農家種糴家收至是智高果爲青所破建炎三年四月鼎州桃源洞大水巨石隨流而下有文曰無爲大道天知人情無爲窈冥神見人形心言意語鬼聞人聲犯禁滿盈地収人魂金石同類類金爲變恠者也紹興二年李綱帥長沙道過建寧僧宗本題邑治之壁曰東燒西燒日月七七後數日江西盜李仁入境焚其邑七月七日也淳熙中淮西競歌汪秀才曲曰騎驢度江過江不得又爲

蹀舞以和之後舒城狂生汪格謀不軌州兵入其家縛之  
其子拒殺聚惡少數千爲亂聲言渡江事平格亦伏誅七  
年正月餘杭門外牆壁有詩其言頗涉恠後廉得主名杖  
遣之主管城北廂劉君暨以失察異言坐削秩其詩不錄  
十四年都城市井歌曰汝亦不來我家我亦不來汝家至  
紹熙二三年其事始應于兩宮紹定三年都城市井作歌  
詞末句皆曰東君去後花無主朝廷惡而禁之未幾太子  
詢薨慶元四年三月甲辰有郵箚置詩達御前者詔宰臣  
究其詩不錄嘉泰四年越人盛歌鐵彈子白塔湖曲俄有  
盜金十一者自號鐵彈子繆傳其鬪死于白塔湖中後獲

於諸暨縣

漢乾祐中荆南高從誨鑿池於山亭下得石匣長尺餘局  
鐫甚固從誨神之屏左右焚香以啓匣中得石有文云此  
去遇龍即歇及建隆中從誨孫繼冲入朝改鎮徐州龍隆  
音相近太平興國中京師兒童以木雕合子中有竅藏掖  
下有聲號云腋底閑後盧多遜投荒人以爲識其在肘腋  
而司國典也天禧二年五月西京訛言有物如烏帽夜飛  
入人家又變爲大狼狀人民多恐駭每夕重閉深處至持  
兵器驅逐者六月乙巳傳及京師云能食人里巷聚族環  
坐叫譟達曙軍營中尤甚而實無狀意其妖人所爲有詔

嚴捕得數輩訐之皆非政和七年詔修神保觀俗所謂二郎神者京師人素畏之自春及夏傾城男女負土以獻揭榜通衢云某人獻土又有飾形作鬼使廵門催納土者或以爲不祥禁絕之後金人幹离不圍京師其國謂之二郎君云紹興元年十二月越州連火民訛言相驚月幾望當再火樞密院以軍法禁之乃定嘉泰二年六月故循王張俊家火後旬日市井訛言相驚絳衣婦人爲火殃下墜都民徙避晝夜弗寧禁之後亦不火慶元六年十月瓊州訛言妖星流墮民郭七家聲如雷通判曾丰暨瓊山縣令移文驚擾後皆坐繙簽書樞密院事林存爲似道所擯道死

于漳漳有富民蓄油黏木甚佳林氏子弟求之價高不得因撫其木曰收取收取待賈丞相用德祐元年似道謫死郡守與之經營竟得此木以殲宋初陳搏有紙錢使不行之說時天下惟用銅錢莫喻此旨其後用交子會子其後會價愈低故有使到十八九紙錢飛上天之謠似道惡十九界之名乃名關子然終爲十九界矣而關子價益低是紙錢使不行也宋以周顯德七年庚申得天下圖識謂過唐不及漢一汴二杭三閩四廣又有寒在五更頭之謠故宮漏有六更按漢四百二十餘年唐二百八十九年開慶元年宋祚過唐十一年滿五庚申之數至德祐二年正

月降附得三百一十七年而見六庚申如官漏之數

建隆三年有象至黃陂縣匿林中食民苗稼又至安復襄  
唐州踐民田遣使捕之明年十二月於南陽縣獲之獻其  
齒革乾德二年五月有象至澧陽安鄉等縣又有象涉江  
入華容縣直過闕闔門又有象至澧州澧陽縣城北乾德  
四年八月普州兎食禾五年有象自至京師雍熙四年有  
犀自黔南入萬州民捕殺之獲其皮角開寶八年四月平  
陸縣鷺獸傷人遣使捕之生獻十頭十月江陵府白晝虎  
入市傷二人太平興國三年果闕蓬集諸州虎爲害遣殿  
直張延鈞捕之獲百獸俄而七盤縣虎傷人延鈞又殺虎

七以爲獻七年虎入蕭山縣民趙馴家害八口淳化元年十月桂州虎傷人詔遣使捕之至道元年六月梁泉縣虎傷人二年九月蘇州虎夜入福山砦食卒四人咸平二年十二月黃州長析村二虎夜鬪一死食之殆半占云守臣災明年知州王禹偁卒咸平六年十月乙酉有狐出皇城東北角樓歷軍器庫至夾道獲之大中祥符九年三月杭州浙江側晝有虎入稅場巡檢俞仁祐揮戈殺之天聖九年五月宿州獲白兔六月廬州獲白兔明道二年六月唐州獲白兔皇祐三年十二月泰州獲白兔嘉祐三年六月丁卯交趾貢異獸二初本國稱貢駒麟狀如牛身被肉甲

鼻端有角食生芻果必先以杖擊其角然後食既至而樞  
密使田況辨其非麟詔止稱異獸熙寧元年九月撫州獲  
白兔十二月嵐州獲白鹿四年九月廬州獲白兔政和五  
年十二月安化軍獲白兔六月泰州軍獲白兔七年二月  
達州獲白兔宣和元年十月淄州獲黑兔宣和七年秋有  
狐由艮獄直入禁中據御榻而坐詔毀狐王廟紹興十一  
年海州屬金悉空其民安江後二十年有二虎入城人射  
殺之虎亦搏人明年魏勝舉州來歸亦空其民漢龔遂曰  
野獸入宮室宮室將空虎豕皆毛孽也十三年南康縣雷  
雨群狸震死于巖穴中巖石皆爲碎二十二年劉彭老家

猫產數子皆三足乾道七年潮州野象數百食稼農設罝  
田間象不得食率其群圍行道車馬歛穀食之乃去淳熙  
二年江州馬當山群狐掠人十年滁州有熊虎同入樵民  
舍夜自相搏死紹熙元年三月臨安府民家貓生子一有  
八足二尾四年郢州武昌縣虎爲人患五年八月揚州獻  
白兔侍御史章穎劾守臣錢之望以孽爲瑞占曰國有憂  
白喪祥也是歲光宗崩慶元三年德興縣群狐入民舍咸  
淳九年十一月辛卯黎明有虎出于揚州市毛色微黑都  
撥發官曹安國率良家子數十人射之制置使李庭芝占  
曰千日之內殺一大將於是齋其肉於城外而厭之紹興

六年四月中京大雪雷震犬數十爭赴土河而死可救者  
才二三淳熙元年六月饒州大雷震犬于市之旅舍慶元  
二年撫州有犬若人坐于郡守之坐未幾郡守林廷彥卒  
于官德祐元年五月壬申揚州禁軍民母得蓄犬城中殺  
犬數萬輸皮納官

乾德三年七月己卯夜西方起蒼白氣長五十尺貫天船  
五車亘井宿占曰主兵動六年十月己未旦西北起蒼白  
氣三道長二十尺趨東散占曰游兵之象太平興國四年  
四月己未夜西北有白氣壓北斗四年正月癸酉起角亢  
經太微垣歷軒轅大星至月傍散至道二年二月丙子夜

西方有蒼白氣長短八道如彗掃稍經天漢參錯如交蛇  
占曰所見之方主兵勝咸平四年三月丙申白氣二亘天  
五年正月白氣如虹貫日久而散七月戊戌白氣如陣貫  
東井六年四月己巳白氣東西亘天丁丑白氣貫日五月  
辛亥白氣出昴至壁沒六月丙子白氣出河鼓左右旗分  
爲數道沒七月癸卯白氣如彗起西南方占曰有兵喪景  
德元年五月白氣貫軒轅蒼白氣十餘如布亘天二年二  
月丁亥白氣五道貫北斗占爲大風辛臣憂十月丙子白  
氣出閣道西孛孛有光占曰宮中憂三年三月白氣貫月  
四年三月己未白氣東西亘天庚申白氣出南方長二丈

許久而不散四月庚午白氣貫北斗長十丈占爲大風庚寅白氣如布襲月三丈許大中祥符元年正月丁丑白氣二東西亘天五年二月壬寅白氣長五丈出東井貫北斗魁及軒轅占爲兵爲雷雨明道元年十二月壬戌西北有蒼白氣亘天康定二年八月庚辰夜東方有白氣長十尺許在星宿度中至十日長丈餘衝天九十餘日沒慶曆八年甲申白氣貫北斗三年正月戊戌中天有白氣長二十尺向西南行貫日占曰邊兵憂四月癸卯白氣二生西北隅上中天首尾至濁東南行良久散占曰其下有兵寇八月壬子夜白氣貫北斗魁九月辛巳夜中有白氣長二丈

許貫卷宿南河東北行少須散占曰風雨之候皇祐四年  
十一月辛酉夜白氣起北方近濁長五丈許歷北斗久之  
散占曰多大風嘉祐七年三月彭城縣白鶴鄉地生麪占  
曰地生麪民將飢五月鍾離縣地生麪治平二年四月丙  
午夜西北方有白氣漸東南行首尾至濁貫角宿移西北  
久方散占曰有兵戰疾疫事熙寧九年四月庚寅夜白氣  
長丈起東北方天市垣元祐三年七月戊辰夜西北有白  
氣經天主兵宜防西北二鄙元符二年九月戊辰夜有白  
氣十道各長五尺主兵及大臣黜二年五月戊子夜蒼白  
氣起東南方長三丈貫尾箕斗主蠻夷入貢舊臣來歸宣

和三年九月壬午夜蒼白氣長三丈貫月主其下有亂者  
靖康元年十二月丙辰白氣出太微垣二月壬午夜  
白氣如虹自南亘北須臾移西南至東北天明而沒二月  
戊子白氣貫斗建炎二年杜充爲北京留守天雨紙錢于  
營中厚盈寸明日與金人戰城下敗績紙白祥也三年三  
月白氣貫日四年五月壬子夜北方有白氣十餘道如練  
二十六年七月辛酉夜天雨水銀紹興元年潭州得白玉  
于州城蓮花池中孔彥舟以獻詔却之前史以爲玉變近  
白祥後彥舟爲劇盜二月己巳夜東南有白氣十一年三  
月庚申金人居長安油酒皆變白色三十年十一月甲午

夜西南有白氣出危入昴十二月戊申白氣出尾入軫貫  
天市垣三十一年十二月辛丑白氣如帶東西亘天出斗  
歷牛隆興元年十二月壬午夜白氣見西南方出危入昴  
二年正月甲寅夜西南有白氣亘天如帶乾道九年正月  
庚午白氣見西北方出奎入參三月戊辰白氣如帶自參  
及角東西亘天四月丁酉夜白氣見西北方入天市垣辛  
丑夜白氣入北斗乙巳夜白氣入紫微垣十月己丑夜蒼  
白氣見南方入翼十一月丙寅白氣如帶出女入昴東西  
亘天十二月庚午夜白氣如帶東西亘天出女入昴淳熙  
十年正月戊子夜西南有白氣如天漢而明南北廣可六

丈東西亘天歷壁至畢紹熙五年六月壬寅夜白氣亘天  
自紫微至亢角己酉日入後白氣亘天頃刻而散慶元四  
年八月庚辰白氣亘天五年二月癸酉夜東北方白氣如  
帶自角至參八月癸亥東北方有白氣如帶亘天嘉泰四  
年十一月辛未晝有白氣分數道亘天嘉熙四年二月丙  
辰白氣亘天淳祐二年四月甲寅白氣亘天景定三年七  
月甲申白氣如匹布亘天咸淳九年襄陽城中白氣自西  
而出

紹興二年宣州有鐵佛象坐高丈餘自動迭前迭郤若偃  
而就人者數日既而郡有火火氣盛金失其性而爲變恠

也七月天雨錢或從石甃中涌出有輪郭肉好不分明穿之碎若沙土二月溫州戒福寺銅佛象頂珠自動光彩激射經日不少停數日火作寺焚淳熙九年春德興縣民家鏡自飛舞與日光相射慶元二年正月泰寧縣耕夫得鏡厚三寸徑尺有二寸照見水底與日爭輝病熱者對之心骨生寒後爲雷震而碎

志卷第十九

志卷第二十

宋史六十七

開府儀同三司樞密軍國事前軍都相監脩國領經筵事鄭武臣脫脫等奉

敕修

五行五

土

稼穡作甘土之性也土失其性則爲災凶舊說以恒風脂  
夜之妖華孽羸蟲之孽牛禍黃眚黃祥皆屬之土今從之  
建隆元年河南諸州乏食乾德元年齊隰等州饑二年州  
府二十二饑開寶四年府州六水一旱諸州民乏食五年  
大饑六年水民饑九年州府十二饑太平興國四年太平  
州饑淳化元年開封河南等九州饑五年京東西淮南陝

西水潦民饑咸平五年河北及鄭曹滑饑景德元年江南  
東西路饑二年淮南兩浙荆湖北路饑三年京東西河北  
陝西饑大中祥符三年陝西饑四年河北陝西劍南饑五  
年河北淮南饑七年淮南江浙饑八年陝州府五饑天  
禧元年饑三年江浙及利州路饑天聖三年晉絳陝解饑  
明道元年京東淮南江東饑二年淮南江東西川饑寶元  
二年益梓利夔路饑嘉祐三年夔州路旱饑熙寧三年河  
北陝西旱四年河北旱饑六年淮南江東劍南西川潤州  
饑七年京畿河北京東西淮西成都利州延常潤府州威  
勝保安軍饑八年兩河陝西江南淮浙饑九年雄州饑十

年漳泉州興化軍饑元豐元年河北饑四年鳳翔府鳳階  
州饑七年河東饑元符二年饑崇寧元年江浙熙河饑大  
觀三年秦鳳階成饑重和元年京西饑五年河北京東淮  
南饑建炎元年汴京大饑米升錢三百一鼠直數百錢人  
食水藻椿槐葉道殣骼無餘齒三年山東郡國大饑人相  
食時金人陷京東諸郡民聚爲盜至車載乾尸爲糧紹興  
元年行在越州及東南諸路郡國饑淮南南京東西民流常  
州平江府者多殍死二年春兩浙福建饑米斗千錢時餌  
餉繁急民益艱食三年吉郴道州桂陽監饑五年湖南大  
饑殍死者衆夏潼川路饑米斗二千人食糟糠興元

饑民流于果闕秋溫處州饑六年春浙東福建饑湖南江西大饑殍死甚衆民多流徙郡邑盜起夏蜀亦大饑米斗二千利路倍之道殣枕藉是歲果州守臣宇文彬獻禾粟九穗圖吏部侍郎晏敦復言果遂饑民未蘇不宜導諛坐黜爵七年夏欽康邕州饑九年江東西浙東饑米斗千錢饑信州尤甚十年浙東江南荐饑人食草木十一年京西淮南饑十八年冬浙東江淮郡國多饑紹興尤甚民之仰哺于官者二十八萬六千人不給乃食糟糠草木殍死殆半十九年春夏紹興府大饑明婺州亦如之二十四年衢州饑二十八年平江府饑二十九年紹興府荐饑隆興元

年紹興府大饑四川尤甚平江襄陽府隨泗州棗陽盱眙軍大饑隨棗間米斗六七千二年平江府常秀州饑華亭縣人食粧糠行都及鎮江府興化軍台徽州亦艱食淮民流徙江南者數十萬乾道元年春行都平江鎮江紹興府湖常秀州大饑殍徙者不可勝計是歲台明州江東諸郡皆饑夏亡麥二年夏亡麥三年九月不雨麥種不入四年春蜀卽縣劖漢州石泉軍大饑卽爲甚盜延八郡漢饑民至九萬餘五年夏饑信州荐饑民多流徙徽州大饑人食蕨葛台楚州盱眙軍亦饑秋冬不雨淮郡麥種不入六年冬寧國府廣德軍太平湖秀池徽和州皆饑七年秋江東

西湖南十餘郡饑江筠州隆興府爲甚人食草實流徙淮甸詔出內帑收育棄孩淮郡亦荐饑金人運麥於淮北岸易南岸銅鑼斗錢八千江西饑流光濠安豐間皆效淮人私糴錢爲之耗荆南亦饑八年江西亡麥隆興府荐饑南昌新建縣饑民仰給者二萬八千餘九年春成都永康卽三州饑秋台州饑溫婺州亦饑淳熙元年浙東湖南廣西江西蜀閩外皆饑台處郴桂昭賀尤甚二年淮東西江東饑滁真揚州盱眙軍建康府爲甚是歲鎮江寧國府常州廣德軍亦艱食詔獎建康留守劉珙振濟有方三年淮甸饑夏台州亡麥冬復施隨郢州荆門軍襄陽江陵德安府

志  
大饑四年春尤饑六年冬和州饑泰通楚州高郵軍大饑人食草木七年鎮江府台州無爲廣德軍民大饑是歲江浙荆湘淮郡皆饑八年春江州饑人采葛而食詔罷守臣章辭冬行都寧國建康府嚴婺太平州廣德軍饑徽饒州大饑流淮郡者萬餘人浙東常平使者朱熹進對論荒政請蠲田賦身丁錢詔江浙淮湖北三十八郡並免之九年春大亡麥行都饑於潛昌化縣人食草木紹興府衢婺嚴明台湖州饑徽州大饑種稑亦絕湖北七郡荐饑蜀潼利夔三路郡國十八皆饑流徙者數千人十年合昌州荐饑民就振相踪死者三十餘人十一年泉州汀漳州興化軍亡

禾邕賓象州饑十二年福建饑亡麥江西廣東西饑金州  
饑有流徙者十四年金洋階成鳳西和州人乏食七月秀  
州饑有流徙者臨安府九縣饑十六年夏成州亡麥冬階  
成鳳西和州荐饑紹熙二年蘄州饑夔路五郡饑渝涪爲  
甚階成鳳西和州亡麥三年資榮州亡麥普叙簡隆州富  
順監皆大饑亡麥殍死者衆民流成都府至千餘人威遠  
縣棄兒且六百人揚州亦饑四年簡資普州饑緜州亡麥  
夏紹興府亡麥安豐軍大亡麥冬亡麥苗行都淮浙  
西東江東郡國皆饑常明州寧國鎮江府廬滁和州爲甚  
人食草木慶元元年春常州饑民之死徙者衆楚州饑人

食糟粕淮浙民流行都三年浙東郡國亡麥台州大亡麥  
民饑多殍襄蜀亦饑四年秋浙東西荐饑多道殣六年冬  
常州大饑仰哺者六十萬人潤揚楚通泰州建康府江陰  
軍亦乏食嘉泰元年浙西郡國荐饑常州鎮江嘉興府爲  
甚二年四川饑廣安懷安軍潼川府大亡麥衡郴州武岡  
桂陽軍乏食三年春邵永州大饑死徙者衆民多剽盜夏  
行都艱食四年春撫袁州隆興府臨江軍大饑殍死者不  
可勝瘞有舉家二十七人同赴水死者開禧二年紹興府  
衢婺州亡麥湖北西淮東西郡國饑民聚爲剽盜南康  
軍忠涪州皆饑嘉定元年淮民大饑食草木流于江浙者

百萬人先是淮郡罹兵農久失業米斗二千殍死者十三  
四炮人肉馬矢食之詔所至郡國振恤歸業時邦儲旣匱  
郡計不支去者多死亦有俘掠而北者是歲行都亦饑米  
斗千錢二年春兩淮荆襄建康府大饑米斗錢數千人食  
草木淮民剗道殮食盡發瘞胷繼之人相掩噬流於揚州  
者數千家度江者聚建康殍死日八九十人是秋諸路復  
大歉常潤尤甚冬行都大饑殍者橫市道多棄兒三年春  
建康府大饑人相食五月衢州饑頗聚爲剽盜七年台州  
大亡麥八年淮浙江東西饑都昌縣爲盜者三十六黨九  
年行都饑閭巷有殍十年台衢婺饒信州饑剽盜起台爲

甚蜀石泉軍饑殍死殆萬人十一年秋淮浙江東饑饉亡  
麥苗十二年春潼川府饑而不害十三年春福州饑人食  
草根十六年春海州新附山東民饑京東河北路新附山  
西民亦饑湖南永道州大饑是歲行都江淮閩浙郡國皆  
亡麥禾十七年春餘杭錢塘仁和三縣饑鎮江府饑真鄂  
州亦乏食嘉熙四年紹興府荐饑臨安府大饑嚴州饑咸  
淳七年江南大饑八年冬襄陽饑人相食德祐二年正月  
揚州饑三月揚州穀價騰踊民相食

乾德二年五月揚州暴風壞軍營舍及城上敵棚開寶二年三月帝駐太原  
州暴風壞軍營舍及城上敵棚開寶二年三月帝駐太原

城下大風一夕而止八年十月廣州颶風起一晝夜雨水  
二丈餘海爲之漲飄失舟檝九年四月宋州大風壞甲仗  
庫城樓軍營凡四千五百九十六區太平興國二年六月  
曹州大風壞濟陰縣廨及軍營四年八月泗州大風浮梁  
竹竿鐵索斷華表石柱折六年九月高州大風雨壞廨宇  
及民舍五百區七年八月瓊州颶風壞城門州署民舍殆  
盡八年九月太平軍颶風拔木壞廨宇民舍千八十七區  
十月雷州颶風壞廩庫民舍七百區九年八月白州颶風  
壞廨宇民舍端拱二年京師暴風起東北塵沙曠日人不  
相辨淳化二年五月通利軍大風害稼三年六月丁丑黑

風自西北起天地晦暝雷震有頃乃止先是京師大熱疫  
死者衆及此風至疫疾遂止至道二年八月潮州颶風壞  
州廨營砦咸平年八月涪州大風壞城舍四年八月丙  
子京師暴風景德二年六月甲午大風吹沙折木八月福  
州海上有颶風壞廬舍三年七月丙寅京師大風四年三  
月甲寅夕京師大風黃塵蔽天自大名歷京畿害桑稼唐  
州尤甚大中祥符二年四月乙未大風起京師西北連日  
不止五年八月京師大風七年三月戊辰京師大風揚沙  
礫是日百官習儀恭謝壇有隨仆者八年六月辛亥京師  
風起已位吹沙揚塵天禧二年正月永州大風發屋拔木

數日止三年五月徐州利國監大風起西南壞廬舍二百餘區壓死十二人四年四月丁亥大風起西北飛沙折木晝晦數刻五月乙卯暴風起西北有聲折木吹沙黃塵蔽天占竝主陰謀姦邪是秋內侍周懷政坐妖亂伏誅天聖九年十二月辛酉大風三日止景祐元年六月己巳無錫縣大風發屋民被壓死者衆九月甲寅夜漏上風自丑起有聲擺木鳴條二年六月戊寅平明風自未來占者以爲百穀豐衍之候皇祐四年七月丁巳大風起西北方拔木嘉祐二年正月元日平旦有風從東北來徧天有蒼黑雲占云大熟多雨熙寧四年二月辛巳京東自濮州至河北

旁邊大風異常百姓驚恐六年四月館陶縣黑風九年十一月海陽潮陽二縣颶風潮害民居田稼十年六月武城縣大風壞縣廨知縣李愈妻主簿寇宗奭妻之母壓死七月溫州大風雨漂城樓官舍元豐四年六月邕州颶風壞城樓官私廬舍七月甲午夜泰州海風作繼以大雨浸州城壞公私廬舍數千間靜海縣大風雨毀官私廬舍二千七百六十三楹丹陽縣大風雨溺民居毀廬舍丹徒縣大風潮飄蕩沿江廬舍損田稼六月邕州颶風壞城樓官私廬舍五年八月朱崖軍颶風毀廬舍元祐八年福建兩浙海風駕潮害民田紹聖元年秋蘇湖秀等州海風害民田

靖康元年正月望夜大風起西北有聲吹沙走石盡明日乃止二月戊申大風起東北揚塵翳空三月己巳夜五更大風乍緩乍急聲如呴怒十一月丁亥大風發屋折木閨十一月甲寅大風起北方雪作盈數尺連夜不止二年正月己亥天氣昏曠狂風迅發竟日夜西北陰雲中如有火光長二丈餘闊數尺民時時見之庚戌大風雨二月乙酉大風折木晚尤甚三月己亥大風四月庚申朔大風吹石折木辛酉北風益甚苦寒建炎元年正月丁酉大風吹石折木十二月乙酉大風拔木紹興二十八年七月壬戌平江府大風雨駕潮漂溺數百里壞田廬三十二年七月戊

申大風拔木溫州大風壞屋覆舟隆興元年浙東西郡國  
風水傷稼二年八月大風雨漂蕩田廬乾道二年八月丁  
亥溫州大風雨駕海潮殺人覆舟壞廬舍五年十月台州  
大風水壞田廬八年六月丙辰惠州颶風壞海船三十餘  
時樞密院調廣東經略司水軍四艦覆其三死者百三十  
餘人淳熙三年六月大風連日四年九月明州大風駕海  
潮壞定海鄞縣海岸七千六百餘丈及田廬軍壘六月乙  
巳夜福清縣興化軍大風雨壞官舍民居倉庫及海口鎮  
人多死者五年正月庚戌大風六年十一月郢州大風覆  
舟溺人甚衆七年二月江陵府大風火及舟焚溺死者尤

衆十年八月辛酉雷州颶風大作駕海潮傷人禾稼林木  
皆折紹熙二年三月癸酉瑞安縣大風壞屋拔木殺人四  
年七月興化軍海風害稼五年六月丙子大風七月乙亥  
行都大風拔木壞舟甚衆紹興府秀州大風駕海潮害稼  
秋明州颶風駕海潮害稼十月甲戌行都大風拔木慶元  
二年六月壬申台州暴風雨駕海潮壞田廬六年三月甲  
子大風拔木嘉泰三年十月丁未暴風十一月癸未大風  
四年正月乙亥亦如之開禧元年四月乙卯九月庚戌大  
風嘉定元年九月乙丑大風二年二月戊子大風七月壬  
辰台州大風雨駕海潮壞屋殺人三年八月癸酉大風拔

木折禾穗墮果實寧宗露禱至于丙子乃息後御史朝陵  
于紹興府歸奏風壞陵殿宮牆六十餘所陵木二千餘章  
四年閏月丁未大風六年十二月餘姚縣風潮壞海隄豆  
八鄉七年正月庚辰江州放鐙黑雲暴風忽作遊人相踐  
死者二十餘十年正月乙未大風拔木十一月丁丑大風  
十一年二月甲寅大風十月戊午大風十三年十一月庚  
戌壬子大風十二月戊午大風十四年六月辛巳大風十  
六年秋大風拔木害稼十七年秋福州颶風大作壞田損  
稼冬郢州暴風壞戰艦二百餘壽昌軍壞戰艦六十餘江  
州興國亦如之嘉熙二年風雹三年風雹淳祐十一年泰

州風景定四年十一月福州颶風咸淳四年閏月丁巳大  
風雷雨居民屋瓦皆動七年五月甲申紹興府大風十年

四月紹興府大風拔木

端拱二年京師暴風起東北塵沙曠日人不相辨淳化三年六月丁丑黑風自西北起天地晦冥雷震有頃乃止大中祥符二年九月無爲軍城北暴風晝晦不可辨拔木壞城門營壘民舍天聖六年二月庚辰大風晝暝康定元年三月丙子大風晝暝經刻乃復嘉祐八年十一月丙午大風霾治平二年二月乙巳大風晝晦四年正月庚辰朔大風霾是日上尊號廷中仗衛皆不能整時帝已不豫後七

日崩熙寧四年四月癸亥京師大風霾元祐八年二月京  
師風霾靖康二年正月己亥天氣昏曠風迅發竟日三月  
丁酉風霾建炎元年正月辛卯朔大風霾丁酉風霾日色  
薄而有暈三月丁酉汴京風霾日無光是日張邦昌僭位  
二年七月癸未風雨晝晦是日東京留守宗澤薨紹興十  
一年三月庚申金人居長安晝晦乾道五年正月甲申晝  
霾四塞淳熙五年四月丁丑塵霾晝晦日無光慶元九年  
十二月乙未天雨霾開禧元年正月壬午雨霾嘉定十年  
正月乙未晝霾二月癸巳日無光德祐元年六月庚子朔  
日有食之既天地晦冥咫尺不辨人雞鶩歸棲自己至午

其明始復

至道二年秋九月環慶州梨生花占有兵明年契丹擾北  
邊景德元年二月保順軍城壕冰陷起文爲桃李華雜樹  
人物之狀大中祥符九年正月霸州渠冰有如華葩狀大  
觀二年十月乙巳冀丘縣檜生花萼如蓮實紹興七年十  
二月中書門下省檢正官張宗元出撫淮西軍寓建康槃  
冰有文如畫佳卉茂木華葉相敷日易以水變態奇出春  
暄乃止二十七年四月徽州祁門縣圃桃已實復華淳熙  
初秀州呂氏家冰瓦有文樓觀車馬人物芙蓉牡丹萱草  
藤蘿之屬經日不釋淳熙中興化軍仙遊縣九坐山古木

末生花臭如蘭

建隆二年九月渭南縣虸蚄蟲傷稼三年七月兗州濟德  
磁洺蠶生乾德六年七月階州虸蚄蟲生太平興國二年  
六月磁州有黑蟲群飛食桑夜出晝隱食葉殆盡七月邢  
州鉅鹿沙門二縣步屈蟲食桑麥殆盡五年七月濰州虸  
蚄蟲生食稼殆盡七年九月邠州虸蚄蟲生食稼九年七  
月泗州蠓蟲食桑雍熙二年四月天長軍蠓蟲食苗端拱  
二年七月施州虸蚄蟲生害稼淳化元年四月中都縣𧈧<sub>虫</sub>  
生七月單州𧈧蟲生遇雨死景德元年八月陝賓棣州  
𧈧螟害稼大中祥符四年八月兗州虸蚄蟲生有蟲青色

隨齧之化爲水六年九月陝西同華等州虸蚄蟲食苗天  
聖五年五月戊辰磁州蟲食桑景祐四年五月滑州靈河  
縣民黃慶家蠶自成被長二丈五尺闊四尺嘉祐五年深  
州野蠶成璽被于原野熙寧九年五月荆湖南路地生黑  
蟲化蛾飛去全州生黑蟲食苗黃雀來食之皆盡元祐六  
年閏八月定州七縣野蠶成璽七年五月北海縣蠶自織  
如絹成領帶元符元年七月藁城縣野蠶成璽八月行唐  
縣野蠶成璽九月深澤縣野蠶成璽織紅成萬匹二年六  
月房陵縣野蠶成璽政和元年九月河南府野蠶成璽四  
年相州野蠶成璽五年南京野蠶成璽織紬五匹綿四十

兩聖鹽十五兩紹興二十九年秋浙東江東西郡縣螟三十年十月江浙郡國螟蠧隆興元年秋浙東西郡國螟害穀紹興府湖州爲甚二年台州螟乾道三年八月江東郡縣螟騰淮浙諸路多言青蟲食穀穗六年秋浙西江東螟爲害九年秋吉贛州臨江南安軍螟淳熙二年秋浙江淮郡縣螟四年秋昭州螟五年昭州荐有螟騰七年秋永州螟八年秋江州螟十二年八月平江府有蟲聚于禾穗油灑之即墮一夕大雨盡滌之十四年秋江州興國軍螟十六年秋溫州螟慶元三年秋浙東蕭山山陰縣婺州浙西富陽鹽官淳安永興縣嘉興府皆螟四年秋鉛山縣蟲食

穀無遺穗嘉定十四年明台溫婺衢蘆贊爲災十五年秋  
贑州螟十六年永道州螟紹定三年福建螟端平元年五  
月當塗縣螟淳祐二年五月兩淮螟景定三年八月浙東

西螟

乾德三年眉州民王進牛生二犢四年南充縣民馬全信  
及相如縣民彭秀等家牛生二犢開寶二年九隴縣民王  
達牛生二犢太平興國三年流溪縣民白延進牛生二犢  
五年溫江縣民趙進牛生二犢六年廣都縣趙全牛生三  
犢七年什邡縣民王信華陽縣民袁武等牛生二犢八年  
彭州民彭延閬州民陳則安樂縣民王公泰牛生二犢九

年七月知乾州衛昇獻三角牛雍熙三年果州民李昭牛  
生二犢四年郪縣民鮮于志鮮于臯眉山縣海羅參仁壽  
縣民陰饒成都縣民李本成紀縣民王和敏牛生二犢端  
拱元年眉州民陳希簡晉原縣民張昭郁魏成縣民鮮于  
哿羅江縣民袁族河陽縣民李羨曲水縣民曾虔梓潼縣  
民文光懿永泰縣民羅德緜竹縣民陳洪牛生二犢淳化  
元年縣竹縣民李昌遠簿逸閬州民和中忠州民王欽眉  
州王圖九隴縣民楊臯玄武縣民羊邁達牛生二犢二年  
永川縣民梁行良仁壽縣民梁仁超牛生二犢三年成都  
府民彭齊卿洪雅縣民程讓永昌縣民田昭巴州民杜文

宥廬山縣民白閨牛生二犢四年成都府民任順曲水縣  
民張思方彭山縣民李承遠牛生二犢至道二年新都縣  
民蹇成羨牛生二犢穎陽縣民馮延密牛生三犢其二額  
有白三年新津縣民文承富赤水縣民蘇福廣安軍吏胥  
仁迪牛生二犢咸平元年眉山縣民向瓊玖陳元寶丹陵  
縣民劉承鶴通泉縣民王居中曲水縣民楊漢成楊景歡  
王師讓眉山縣民陳彥宥牛生二犢二年濛陽縣民杜摯  
九隴縣民楊太眉山縣民蘇仁義洪雅縣吏陸文贊牛生  
二犢三年叙浦縣民戴昌蘊牛生二犢四年流溪縣民何  
承添晉原縣民頗全永昌縣民曾嗣犀浦縣民何福彰明

縣民王玘牛生二犢六年渠江縣民王德進魏城民蒲諫  
王信石照縣民仲漢宗大足縣民劉武牛生二犢景德元  
年魏城縣民閻明彭州濛陽縣民郭琮牛生三犢二年三  
泉縣民李景順東海縣民時祐小溪縣劉可赤水縣民羅  
永並牛生二犢三年長江縣民于承琛牛生二犢四年相  
如縣民楊漢暉邛州安仁縣民羅瑩九隴縣民白彥成渠  
江縣民王繼豐家及順安軍屯田務牛生二犢大中祥符  
元年龔丘縣民李起牛生四犢判州王欽若圖以獻二年  
立山縣民盧仁依銅山縣民勾熙正什邡縣民杜族南康  
縣陳邦並牛生二犢三年犍爲縣民陳知進牛生二犢四

年東關縣民陳知進牛生二犢五年富順監些井場官楊  
守忠曲水縣民向平蓬溪縣民蹇知密牛生二犢六年廣  
安軍依政縣民李福貴溪縣民徐志元牛生二犢七年雙  
流縣民姚彥信涪城縣民張禮嘉州龍遊縣民張正夾江  
縣民郭昇天水縣民王吉牛生二犢八年仁壽縣民何志  
通泉縣民羅永泰成都縣民張進華陽民楊承珂牛生二  
犢九年平定軍平定縣民范訓臨邛縣民楊暉牛生二犢  
天禧元年開江縣民冉津及澧州石門縣層山院牛生二  
犢二年臨邛縣民王道進臨溪縣民王勝西縣民韓光緒  
牛生二犢四年貴溪縣民葉政牛生二犢五年巴西縣民

向知道牛生二犢自天聖迄治平牛生二犢者三十二生  
三犢者一自熙寧二年距元豐八年郡國言民家牛生二  
犢者三十有五生三角者一元祐元年距元符三年郡國  
言民家牛生二犢者十有五大觀元年閬州達州言牛生  
二犢四年三月帝謂起居舍人宇文粹中曰牛產二犢亦  
載之起居注中豈若野蠶成蠻之類民賴其利乃爲瑞邪  
自是史官不復盡書政和五年七月安武軍言郡縣民范  
濟家牛生麒麟重和元年三月陝州言牛生麒麟宣和二  
年十月尚書省言歙州歙縣民鮑珙家牛生麒麟三年五  
月梁縣民邢喜家牛生麒麟紹興元年紹興府有牛戴刃

突入城市觸馬裂腹出腸時衛卒多犯禁屠牛牛受刃而  
逸近牛禍也十六年靜江府城北二十里有奔犢以角觸  
人於壁腸胃出牛狂走兩日不可執卒以射死十八年五  
月依政縣牛生二犢二十一年七月遂寧府牛生二犢者  
三二十五年八月漢中牛生二犢淳熙十二年仁和縣良  
渚有牛生二首七日而死餘杭縣有犢二首十六年三月  
池州池口鎮軍屯牛狂走觸人死慶元三年樂平縣田家  
牛生犢如馬一角鱗身肉尾農以不祥殺之或惜其爲麞  
同縣萬山牛生犢人首

淳化三年正月乙卯京師兩土占曰小人叛自後李順盜

據益州景德元年七月辛亥黃氣出壁長五尺餘占曰兵  
出二年正月丙寅黃白氣環之大中祥符元年正月癸亥  
朔黃氣出於艮占曰主五穀熟二年九月戊午黃氣如柱  
起東南方長五丈許天禧五年襄州鳳林鎮道側地涌起  
高三尺闊八尺知州夏竦以聞明道元年十月庚子夜黃  
白氣五貫紫微垣景祐元年八月壬戌夜有黃白氣如彗  
長七尺餘出張翼之上凡三十有三日不見治平元年三  
月壬戌雨土十二月己亥雨黃土熙寧五年十二月癸未  
七年三月戊午並雨黃土八年五月丁丑雨黃土兼細毛  
元豐二年十一月丁亥五年三月乙巳六年四月辛未雨

土元祐七年正月戊午天雨塵土主民勞苦宣和元年三  
月庚午雨土著衣主不肖者食祿紹興十一年三月庚申  
涇州雨黃沙十八年十一月壬辰肆赦天有雲赤黃近黃  
祥也太史附秦檜旨奏瑞乾道四年三月己丑雨土若塵  
淳熙四年二月戊戌雨土五年二月壬午甲申四月丁丑  
六年十一月乙丑十一年正月辛卯甲寅十三年正月壬  
寅亦如之十五年九月庚子南方有赤黃氣紹熙四年十  
月甲寅雨土五年四月癸卯亦如之十月乙未天有赤黃  
色占曰是爲天變色先赤後黃近黃赤祥也十一月辛亥  
雨土慶元元年二月己卯十一月己丑天雨塵土三年正

月丙子四月丙午十二月甲申天雨塵土六年正月己巳  
閏月丁未十月己丑雨土九月辛丑十一月辛卯天雨塵  
土嘉泰元年六月己卯九月己未十二月辛丑天雨塵土  
嘉定三年正月丙午天雨塵土八年二月己未五月辛未  
天雨塵土九年十二月癸巳天雨土十年二月癸巳雨土  
十二年二月癸巳天雨塵土十三年三月辛卯天雨塵土  
十六年二月戊子天雨塵土紹定三年三月丁酉雨土嘉  
熙二年四月甲申雨土三年三月辛卯天雨塵土淳祐五  
年二月丙寅朔天雨塵土十一年三月乙亥天雨塵寶祐  
三年三月己未雨土六年二月壬辰天雨塵土開慶元年

三月辛酉雨土景定五年二月辛未雨土德祐元年三月  
辛巳終日黃沙蔽天或曰喪氣

乾德三年京師地震史失日月五年十一月許州開元觀老君像自動知州宋偓以聞六年正月簡州普通院毗盧佛像自動至道二年十月潼關西至靈州夏州環慶等州地震城郭廬舍多壞占云兵饑是時西夏寇靈州明年遣將率兵援糧以救之關西民饑咸平二年九月常州地震壞鼓角樓羅務軍民廬舍甚衆四年九月慶州地震者再六年正月益州地震景德元年正月丙申夜京師地震癸卯夜復震丁未夜又震屋皆動有聲移時方止癸丑冀州地震

占云土工興有急令兵革興是年契丹犯塞二月益黎雅  
州地震三月邢州地震不止四月己卯夜瀛州地震五月  
邢州地復震不止十一月壬子日南至京師地震癸丑石  
州地震四年七月丙戌益州地震己丑渭州瓦亭岩地震  
者四大中祥符二年三月代州地震四年六月昌眉州並  
地震七月真定府地震壞城壘天聖五年三月秦州地震  
七年京師地震景祐四年十二月甲子京師地震甲申忻  
代并三州地震壞廬舍覆壓吏民忻州死者萬九千七百  
四十二人傷者五千六百五十五人畜擾死者五萬餘代  
州死者七百五十九人并州十八百九十八人寶元元年正

月庚申并忻代三州地震十二月甲子京師地震慶曆三年五月九日忻州地大震說者曰地道貴靜今數震搖兵興民勞之象也四年五月庚午忻州地震西北有聲如雷五年七月十四日廣州地震六年二月戊寅青州地震三月庚寅登州地震岠嵎山摧自是震不已每震則海底有聲如雷五月甲申京師地震七年十月乙丑河陽許州地震皇祐二年十一月丁酉夜秀州地震有聲自北起如雷嘉祐二年雄州北界幽州地大震大壞城郭覆壓者數萬人五年五月己丑京師地震治平四年秋漳泉建州邵武興化軍等處皆地震潮州尤甚拆裂泉涌壓覆州郭及兩

縣屋宇士民軍兵死者甚衆八月己巳京師地震熙寧元年七月甲申地震乙酉辛卯再震八月壬寅甲辰又震是月須城東阿二縣地震終日滄州清池莫州亦震壞官私廬舍城壁是時河北復大震或數刻不止有聲如雷樓櫓民居多摧覆壓死者甚衆九月戊子莫州地震有聲如雷十一月乙未京師及莫州地震十二月癸卯瀛州地大震丁巳冀州地震辛酉滄州地震湧出沙泥船板胡桃螺蚌之屬是月潮州地再震是歲數路地震有一日十數震有踰半年震不止者二年十月庚戌南郊東壇門內地陷有天寶十三年古墓元豐元年邕州佛像動搖初像動而夏

人入寇又動而州大火其後懷智高叛復動於是知州錢  
師孟投其像于江中八年二月甲戌賓州嶺方縣地陷五  
月丙午京師地震元祐二年二月辛亥代州地震有聲四  
年春陝西河北地震七年九月己酉蘭州鎮戎軍永興軍  
地震十月庚戌朔環州地再震紹聖元年十一月丙戌太  
原府地震三年十月十一月河南府地震是歲蘇州自夏  
迄秋地震十三年三月戊戌夜劍南東川地震九月己酉  
滁州沂州地震四年六月己酉太原府地震有聲元符元  
年七月壬申夜雲霧蔽天地震良久二年正月壬申恩州  
地震八月甲戌太原府地震三年五月己巳太原府又震

建中靖國元年十二月辛亥太原府潞晉隰代石嵐等州  
岢嵐威勝保化寧化軍地震彌旬晝夜不止壞城壁屋宇  
人畜多死自後有司方言祥瑞郡國地震多抑而不奏政  
和七年六月詔曰熙河環慶涇原路地震經旬城砦關堡  
城壁樓櫓官私廬舍並皆摧塌居民覆壓死傷甚衆而有  
司不以聞其遣官按視之宣和四年北方用兵雄州地大  
震玄武見於州之正寢有龜大如錢蛇若朱漆筋相逐而  
行宣撫使焚香再拜以銀盞貯二物俄俱死六年正月京  
師連日地震宮殿門皆動有聲七年七月己亥熙河路地  
震有裂數十丈者蘭州尤甚陷數百家倉庫俱沒河東諸

郡或震裂建炎二年正月戊戌長安地大震金將婁宿圍城彌旬無外援乘地震而入城遂陷紹興三年八月甲申地震平江府湖州尤甚是歲劉豫陷鄧隨等州金人犯蜀四年四川地震五年五月行都地震六年六月乙巳夜地震自西北有聲如雷餘杭縣爲甚是冬劉麟猊犯順寇濠壽州七年地震二十四年正月戊寅地震二十五年三月壬申地震二十八年八月甲寅夜震三十一年三月壬辰地震三十二年七月戊申地震隆興元年十月丁丑地震六年甲寅又震乾道二年九月丙午地震自西北方四年十二月壬子石泉軍地震三日有聲如雷屋瓦皆落時絲

竹有冤獄云淳熙元年十二月戊辰地震自東北方九年  
十二月壬寅夜地震十年十二月丙寅地震十二年五月  
庚寅地震慶元六年九月東北地震十一月甲子地震東  
北方嘉定六年四月行都地震六月丙子淳安縣地震九  
年二月辛亥東西川地大震四日十年二月庚申地震自  
東南十二年五月地震六月西川地震十四年正月乙未  
夜地震大雷五月丙申西川地震寶慶元年八月己酉地  
震嘉熙四年十二月丙辰地震淳祐元年十二月庚辰夜  
地震寶祐三年蜀地震咸淳七年嘉定府城震者三

雍熙三年階州福津縣常峽山圮壅白江水逆流高十許

丈壞民田數百里淳化二年五月名山縣大風雨登遼山  
圯壅江水逆流入民田害稼咸平元年七月庚午寧化軍  
汾水漲壞北水門山石摧圯軍士有壓死者二年七月庚  
寅靈寶縣暴雨崖圯壓居民死者二十二戶三年三月辛  
丑夜大澤縣三陽砦大雨崖摧壓死者六十二人四年正  
月成紀縣山摧壓死者六十餘人景德四年七月成紀縣  
崖圯壓死居民天熙五年九月丙寅華州少華山前阜頭  
峯越八盤領及谷摧陷於石子坡東西五里南北十里潰  
散墳裂湧起堆阜各高數丈長若隄岸至陷居民六社凡  
數百户林木廬舍亦無存者並山之民言數年以來峯上

常有雲每遇風雨即隱隱有聲是夜初昏略無風雨山上  
忽霧起有聲漸大地遂震動不及食頃而山摧元祐元年  
十二月鄭縣界小敷谷山頽傷居民紹興十二年十二月  
陝西不雨五穀焦枯涇渭灑澑皆竭時秦民以饑離散壯  
者爲北人所買郡邑遂空紹熙四年秋南岳祝融峯山自  
摧劍門關山摧五年十二月臨安府南高峯山自摧慶元  
二年六月辛未台州黃巖縣大雨水有山自徙五十餘里  
其聲如雷草木冢墓皆不動而故址潰爲淵潭時臨海縣  
清潭山亦自移嘉泰二年七月丁未閩建安縣山摧民廬  
之壓者六十餘家嘉定六年六月丙子嚴州淳安縣長樂

鄉山摧水湧九年黎州山崩咸淳十年天目山崩

熙寧元年荆襄間天雨白釐如馬尾長者尺餘彌漫山谷

三月丁酉潭州雨毛八年五月丁丑雨黃毛紹熙四年十

一月癸酉地生毛咸淳九年江南平地產白毛臨安尤多

卷之二十一

庚子

庚子

庚子

庚子

庚子

庚子

庚子

庚子

志卷第二十